

يوميات

# يوميات الحبيب

الدكتور علي راشد



الجزء الاول

إنتاج شركة هاشم إخوان

١٩٩٧



## مقدمة :

«بوية الحبوية، أنبوية بوتاجاز .. زكية .. شقية .. على درجة عالية من الفهم والوعى .. تعرف أصول الأخلاق الحميدة ومظاهر السلوكيات القويمة .. وعلاوة على ذلك فهي تتسم بوطنية عالية . فهي تحب بلدها وتود ان تكون مصر والمصريين أحسن البلاد وأفضل الشعوب فى العالم ..

وتروى «بوية الحبوية» فى يومياتها رحلاتها الغازية فى البيوت وفى غير البيوت منذ بدأت أول مشوار فى حياتها وحتى الآن .. وهى فى تلك الرحلات دقيقة الملاحظة .. سريعة الفهم .. قوية الاحتمال والصبر .. ترصد الايجابيات فى حياتنا الاجتماعية وتؤيدها .. كما ترصد السلبيات وتعارضها وتبين النتائج المترتبة على المجتمع وأفراده من هذه السلبيات .

ومصادر المعايير التى تتخذها «بوية» فى تقويم سلوكيات أفراد المجتمع على اختلاف مستوياتهم هى : مراجعنا الدينية وعاداتنا وتقاليدنا الصحيحة وثقافتنا الشرقية الأصيلة ..

وإن كان نقد «بوية الحبوية» لحياة الأفراد الاجتماعية وسلوكياتهم الظاهرية فى شكل طريف وثوب ظريف، إلا أن مضمون هذا النقد فى غاية الجدية ومنتهى الأهمية حيث يكشف عن قبح الأهواء البشرية وسوء التصرفات السلوكية وهذا يتيح لكل منا الفرص ليعدل تصرفاته وسلوكياته ويحسن عمله ويقوى عزائمه ويشحذ هممه ليرتقى وندفع ببلدنا الحبيب مصر نحو طريق الحضارة والرقى جنباً إلى جنب مع الشعوب المتحضرة المتقدمة وهذا ما نتمناه وتستهدفه .. «بوية الحبوية»

المؤلف



## يوميات «أنبوية بوتاجاز»

### (١) بداية حياتي الغازية

كنت في أحسن منظر وأبهة لما خدوني لأول مرة في حياتي الغازية علشان يعبونى بغاز البوتاجاز لأبدأ أول خطواتي في حياتي العملية .. وفعربية طويلة مليانة باخواتي الأنابيب راحو رميني رمية صرخت منها صرخة تصحى الأموات .. وقلت في سرى يا ناس خلي في قلوبكم رحمة وحسبو على جسمي والغاز اللي جوايا .. المهم .. ودونا بعد رحلة طويلة مليانة بكل أنواع المطبات الطبيعية والصناعية والزراعية غير برك المية على مكان واسع اسمه المستودع .. وكنت فاكرة إن في المكان ده هيعملونا معاملة كويسه .. لكن خاب ظني .. فالعامل المسئول عننا يشيل الواحدة مننا من على العربية ويهبدها على الأرض حتة هبدة لازم تعملها عاهة مستديمة تفضل معاها طول حياتها .. وبعد ما صدمت أول صدمة في حياتي الغازية رصّونا في فسحة المستودع .. ولما بصيت على اخواتي الأنابيب حصلنى فزع ورعب وزاد ضغط الغاز اللي جوايا عشر مرات وده من وجودى وسط كل الأنابيب اللي أحوالها متسرش عدو ولأحبيب .. فالأنبوية ديه مفقوعة من جنبها .. ودى واكل الصدا من جسمها رقات .. ودى من كتر القذارة اللي عليها مش باين ليها لون .. ودى عندها حول في المحبس .. ودى .. ودى ..

ولما بصيت عليهم وانا قرفانة من مناظرهم ضحكوا عليا وقالولى : بكرة ياختى تبقى أزفت مننا ما أحنا كنا زيك وأحسن لكن اتمرطنا عند اللي يسوى واللى ما يسواش .. وأثرت الصمت وما ردتش عليهم لاحساسى إن ده حسد منهم .. وبعد فترة قصيرة راح لافحنى عامل من عمال المستودع على كتفه وفشنطة عربية مكرتبة ، معفرة راح هبدى الهبدة الثانية في حياتي وسمعتة بيقول لصاحب العربية اللي هيخدنى لبيتة لأول مرة في حياتي

-تلاته جنبه ونص ما ينقصوش قرش تعريفه .. دى أنبوية جديدة زى العروسة وأول واحد راح يستعملها أنت يا بيه ..

وبامتعاص مشوب بالفرح دفع البيه الثلاثة جنيه ونصف وسمعتة بيقول في سره:

- تلاته جنيه ونص حار ونار في جنتك وجتة اللي مشغلينك ..

وفي رحلة قصيرة لا تخلو من المطبات الطبيعية والصناعية والزراعية وبرك الميه  
خدنى البيه لشقته وأنا كلي أمل أنى حقضى وقت جميل مع أول أسرة فى حياتى الغازية.





أول رحلة في حياتي الغازية

## (٢) اهمال x اهمال

منذ اللحظة الأولى لدخولى شقة البيه صدمت صدمة غازية شديدة خلّتني معرفش افرق بين الخرطوم والمنظم .. وقلت فى سرى يافرحه ما تمت خدها الغراب وطار .. فالشقة مبهدلة حته بهدله .. والصالة آخر فوضى .. ديه شوية لعب أطفال مرمية على الأرض .. ودى مخدات نوم محطوطين على كنب الصالون والانتريه .. ودى جرايد ومجلات قديمة متلقحة فى كل مكان ولمحت وانا داخله المطبخ أوض الشقة متقلش فى الفوضى والاهمال عن الصالة ولما دخلت المطبخ جتنى حالة إكتئاب من منظره ورحته ودعيت ربنا ما يورى حد اللى أنا شيفاه .. حلل من جميع المقاسات فيها بقايا أكل وطبيخ مرمية على الترابيزة وعلى الأرض كوبيات مش نضيفه فى كل مكان .. التلاجة بابها مفتوح وعينك ما تشوف اللى نور من جواها .. وفرن البوتاجاز اللى فصلت جنبه كام يوم متعرفش كان لونه ايه من كتر بقع الطبخ والشاى والقهوة والقرفة والحلبة والمغات .. وكله كوم وكيس الزبالة كوم .. مليون لآخره والزبالة حوليه .. ويتهل الروايح منه .. روايح تجيب كل أمراض الجهاز التنفسى المعروفة وغير المعروفة .. ولأ الحشرات أشكال وألوان بتجرى فى كل مكان .. يعنى بصراحة شقة أقل وصف ليها انها اهمال x اهمال .. المهم لما بدأت اشتغل تأكد ليه الاهمال الفظيع فى الشقة ديه .. تيجى الست الهانم تشغلنى وتسبب البوتاجاز والع عالفاضى وتروح تتكلم فى التليفون اكثر من ساعة وأنا بفوضى شويه شويه من غير لازمه .. حاجه تفرس .. ولا لما تعمل شاى وتحط البراد على البوتاجاز وتشغلنى تروح وتسبب الميه فى البراد تغلى وتغلى والبخار يطلع ويطلع لحد ما الميه تخلص والبراد ينحرق وفين وفين لما الست هانم تفتكر وترجع للمطبخ وتملى البراد المحروق بالميه مرة تانيه علشان تعمل الشاى .. يعنى بصراحه اهمال وتسبب يودو فى داهيه . وكلها كام يوم وطبعاً خلص الغاز اللى جوايا وخذنى البيه وراح هيدنى داخل شنطة العربية المكركبة والمعفرة ورجعنى تانى للمستودع علشان بيدلنى بانبويه مليانه يكرر معاها كل اللى حصلنى .. وبعد إعادة مليى بالغاز وقفت مع اخواتى الأنابيب استعداداً للمشوار التانى فى حياتى الغازية .



..آخر اھمال

### (٣) الصمت الرهيب

في أحد مشاويري المتكررة التي تشكل حياتي الغازية وجدت نفسي في إحدى الشقق الفاخرة التي تتميز بالمساحات الواسعة جداً والأثاث الفاخر السوبر والأناقة العالية في التنظيم والديكورات الشيك بالقوى والزرع الطبيعي الأخضر الجميل والزهور أشكال وألوان ورحتها ترد الروح.. قصدي ترد الغاز.. أما المطبخ - سكنى المؤقت- فده لوحده حكاية ورواية .. مساحته تقريبا قد مساحة شقة من الشقق بتوع الاسكان الشعبي.. وفيه كل حاجة تخطر على البال .. الديكورات.. الزرع الطبيعي .. الزهور.. حجرة سفرة صغيرة جميلة وشيك.. جمال أیه.. نظافة أیه.. وقلت في سرى بعد ما استقرت في المكان الجميل ده : صبرتي يا بويه ونلتی.. لكن فرحتی ما تمتش زى ما اكون موعودة بالهم.. فالشقة الواسعة الجميلة الشيك دية هس.. هس.. ما فيهاش حد بيتكلم.. أصحابها بما فيهم الشغالة محدش فيهم بينطق زى ما يكونوا خرس.. فالست بتاعتنا استاذة جامعية وعلى طول فى ايدها كتاب بتقرا فيه سواء قاعدة ولا ماشية ولا بتاكل.. وسى الأستاذ جوزها طبيب مشهور دايماً بره فى العيادة.. ويظهر انه متفق مع الاستاذة انهم ما يجيبوش اولاد يشغلوا كل واحد فيهم عن شغله وطبعا مواعيد الجامعة مختلفة عن مواعيد العيادة.. علشان كده الشغالة بتحضر الفطار مرتين والغدا مرتين والعشا مرتين.. وحتى الشغالة دية وهى بتحضر الأكل ولا بتشيله ولا بتطبخ ولا بتغسل المواعين بتعمل كل شغلها في صمت .. صمت رهيب.. ياناس يا هوو.. فين الكلام؟ فين المناقشات؟ فين أصوات الأولاد ولعبهم وضحكهم؟ الإجابة: مفيش.. لا حياة لمن تنادى حتى حاولت أنس نفسى وأسمع كلام من الشقة اللي جانيينا .. مفيش برضه.. لأن أصحاب الشقة حطين مواد عازلة للصوت على الحيطان .. وتعبت وتعب معايا المنظم والخرطوم .. تعبت من برودة المشاعر اللي عند أصحاب الشقة ديه .. صحيح المكان اللي أنا فيه مؤقتاً جنة.. لكن جنة من غير مشاعر.. جنة من غير دفاء.. جنة من غير ناس.. وعلى رأى المثل: جنة من غير ناس ما تنداس.. وقعدت أصبر نفسى وأقول : أصبرى يا بت يا بويه.. أهوكلها كام يوم ويخلص الغاز اللي جواكي وتطلعى من الجنة الصامتة دية.. وفعلاً بعد كام يوم خلص الغاز اللي جوايا وراحو مغيرني وخرجت غير آسفه من هذا العالم الجميل الصامت صمت القبور.





صوت القبور

## (٤) الزمبليطة x الصالون

مرة ثانية لقيت نفسي رايحة لبيت من البيوت، قلت في سري : ياريت يا بت يا بويه ربنا يرزقك المره ديه بناس كويسين وبيت مريح تعوضى بيه المرات اللى فاتت لكن على ما يبدو إن نقبي طلع على شونه.. فمن أول ما خدني صاحب البيت اللى أنا ربحاله في عربيته وأنا مش متوقعة خير أبداً.. فصوته وهو بيكلم ابنه اللى معاه عامل زى صوت وابور الزلط الماشي على دبش محجر.. وسمعته بيقول لابنه :

- حوصلك يا ابو مخ تخين للبيت تطلع الزفته ديه (عليا أنا بويه الحبويه .. جتك واكسه) ومتقمش بعد كده من عالمكتب دى تالت سنه فى الهبابه دى اللى بيسموها الثانوية العامه .. جتك داهيه ما أنت طالعلى فى زناخة المخ..

كل ده والواد ابنه يا حبة عيني.. قصدى يا حبة محبسي.. ما بينطقش.. قصر الكلام.. رحنت البيت واللى توقعته لقيته.. البيت مليون عيال من أول مرحلة الحمل مروراً بمرحلة الرضاعة فالحضانة فالمدرسة الابتدائية والإعدادية لغاية الثانوية العامه.. والبيت طول النهار يضرب يقلب والصراخ والخناقات بين العيال .. وزعيق أهمهم فيهم.. وكل ده كوم وزعيق أبوهم «أبو صوت عامل زى صوت وابور الزلط الماشي على دبش محجر» كوم.. ولا الشتيمة اللى بسمعها سواء لولاده أو لمراته حاجه تكسف.. أبقى عايزه أسد المنظم وأسد الخرطوم علشان ما سمعش الشتيمة ديه .. وقلت لما يبجي الليل العملية حتهدا شويه.. أبدا .. يقعدوا العيال وأبوهم وأهمهم في الصالون وصوتهم وهمه بيتكلموا يهز البيت هز زى ما يكون فيه زلزال.. والاكاده إن الكل بيتكلموا في نفس واحد.. طيب ياربي مين بيسمع مين؟ معرفش.. المهم.. الزبطة والزمبليطة اللى فى الصالون ديه ما تنتهيش إلا فى ساعة متأخرة من الليل.. وأقول في سري خلاص يا بت بويه حيقوموا يناموا وارتاح شويه من التلوث الضوضائى اللى عملاه العيله ديه.. لكن أبدا ربنا مش كاتب عليه راحه.. بعد ما الكل ينام بيتدى بسلامته أبوهم يغط فى النوم واسمع شخيره زى الرعد وهو بيهز أطراف المدينة.. ودعيت ربي إن



يا ناس حرام عليكم الزمبيطة دي

الغاز اللى جوايا يخلص علشان أخلص أنا من الزيتة والزملبيلة والدوشة اللى ما بتنقطعش لا ليل ولا نهار.. وفين وفين لم خلصت وطلعت من البيت ده وأنا بدعي ربنا أن محدش يسمع اللى أنا سمعته.. لا عدو،، ولا حبيب انه سميع قريب مجيب الدعوات..

### (٥) حب وتريية

دخلت المره ديه شقة وأنا واثقة ومتأكدة إنى حشوف اللى شفته قبل كده واكثر.. اهمال وزعيق وشتيمه وخلافه.. لكن اللى توقعته ملقتوش.. بالعكس شفت وسمعت كل شىء جميل وقلت فى سرى : والله يا بت يا بويه صبرتى ونلتى بحق وحقيق.. الشقة لما دخلتها آخر نضافه.. ست البيت ما شاء الله عليها.. عقل أيه.. جمال أيه.. أخلاق أيه.. نظام أيه.. مخليه بيتهاجنة لجوزها وأولادها.. يدخل جوزها من الشغل يلاقى البيت آخر جمال ورواقه.. والست بتاعته اللهم صلى على النبي زى الوردة المفتحة.. تستقبله بلبس جميل وبسيط ورحته زى الفل وإبتسامه حلوه منوره من وشها اللى زى القمر.. وحب فى القلب باين على الوش وفى لمسة الايدين.. وبعد الاستقبال الحار اللى مليون حب بالقوى تجهز له الغدا على تربييزه جميله ومحندة فى المطبخ ويقعدوا يقولوا لبعض كلام زى العسل.. وحشتينى يا حياتى.. أنت أكثر يا روحى.. دا أنا بنسى كل تعب الشغل لما يرجع واشوفك يا حبيبتى.. وأبقى وأنا بسمعهم وهمه بيقولوا الكلام الحلو ده لبعضهم فرحانه قوى ولو انى ببقى مكسوفة من كلامهم العسل ده.. واوشوش المنظم والخرطوم واقولهم شوفوا الحب اللى يعمر البيوت ويرد الروح.. قصى يرد الغاز..



ياسلام على البيوت المحترمة

الحب ده كله كوم.. وحب الست الهانم وتربيتها لأولادها كوم.. يدخل سى حماده والكتكوته مزمر من المدرسة تستقبلهم أهمهم بكل الفرح والسعادة حتنط من وشها اللي زى القمر وتقولهم : حماده .. مزمر.. وحشتونى يا اولاد.. ويجرى الاولاد الحلوين على أهمهم ويقولوا : دا أنتى اللي وحشتينا قوى يا مامى .. ويقعدوا يبوسو فيها أكثر من أبوهم.. الشهادة للحق هى ست ولا كل الستات وتتحب بصحيح .. وتربيتها لأولادها على أعلى مستوى .. ورغم مشاغل البيت الكثيرة بتساعد جوزها فى بعض الأمور اللي تخلص شغله .. ويتساعد أولادها فى المذاكرة وحل الواجبات المدرسية .. وقعدت أقول لنفسى امسكى الغاز اللي جواكى يا بت يا بوية أكبر فترة ممكنة فى البيت الجميل ده .. لكن المكتوب مفيش منه مهروب .. خلص الغاز اللي جوايا وخرجت من البيت ده وأنا بدعى ربنا علشان أرجع البيت ده تانى واشوف ست الستات تانى وهى منوره بتها وتملاه كمان وكمان حب وتربية .



## (٦) الشخصيه

خدوني المره دى على شقه ودعيت ربنا وقلت: يا رب تطلع زى الشقه اللى فاتت اللى ملياها صاحبته ست الستات حب وتربية .. لكن يظهر انها مرة وعدت.. فبسلامتها ست البيت من النوع الكشر وصوتها يا حفيظ زى باشاويش فى المدفعية صوته أعلى من صوت المعركة .. ويتمشى طول النهار فى الشقه وماسكه فى ايدها عصايه تتوكأ عليها وتهش بها على جوزها الذى لا حول له ولا قوة ولا يستجرى يعمل حاجة اللى باوامر باشاويش المدفعية .. وسمعتها مره فى مناقشه مع بسلامته وهما الاثنين جنبى فى المطبخ حولين الغدا ايه النهارده؟ صرخت مرضعة حتشبسوت بعظمة مرات الفراعنه وقالت: زى كل يوم .. كوسه مسلوقة .. وبصوت مرعوش ولجلجة ونظرات فأر مذعور نطق سبع البريمة بقطرة اعتراض أمام أمواج عاتيه لاعصار مدمر وقال طب ما تخليها النهارده بطاطس مسلوقة يا ست حفيظه هانم .. وإذا ببشاويش المدفعية يعلن الحرب فوراً وصرخت صرخه عكرت الغاز اللى جوايا وقالت: أنا الست حفيظه هانم .. حفيده الأرنأوطى باشا حفيد جناينى محمد على باشا أقول كوسه تقول أنت .. أنت اللى عليتكم ما فيهاش ريحة البهوات ولا البشوات تقول بطاطس .. يال المهزلة الأنويه ..

وبسرعة جدا كالبرق الخاطف يتراجع الفأر المذعور اللى أغلب من الغلب عن موقفه ويعلن بصوت مشبع جدا بذل سوبر:

أنا أسف يا ست حفيظه هانم .. أصل معنديش مفهوميه .. هو فيه احسن من الكوسة المسلوقة فى الدنيا دى كلها يا خواتى

وتنتفخ أوداج مرضعة حتشبسوت حفيده الأرنأوطى باشا حفيد جناينى محمد على باشا .. وتمشى كالعاده مسنودة على العصايه فى خيلاء بعد انتصارتها المتكررة والدائمة

- دوام شروق الشمس من المشرق وغروبها من الغرب- وهزمت جوزها الشخصيه ولسان حالها بيقول: يا أرض اتهدى ما عليكى قدى .. وعرفت بالصدفه اسم جوزها الهمام

لما جه البوسطجى يسلم ليه جواب ونادا البوسطجى الأستاذ عبد القوى شديد الحديدى ..  
جواب مسجل وفطست على غازى من الضحك لما سمعت اسم خيال المآته ده .. بقا اسمه عبد  
القوى شديد الحديدى وقلت يا سلام يابت يا بويه لو كنتى بتشتغلى فى السجل المدنى لخليت  
اسمه مذلول ضعيف المصدى وفانت الأيام والأحوال هى الأحوال .. طول النهار باشاويش  
المدفعية الست حفيظة هانم الأرنأوطى تشخط وتنظر فى جوزها اللى عمال يجرى يمين  
وشمال ينفذ كلامها ودمه ناشف من الخوف منها .

وقلت فى سرى: ياريت يا بويه يخلص الغاز اللى جواكى بأقصى سرعه علشان اخرج  
من البيت ده اللى عامل زى بلد بيحكمه حاكم ظالم متغطرس وماسك شعبه فى ايده زى  
الشخشيخه يعمل بيها زى ما هو عايز .. ولما خلص الغاز اللى جوايا حمدت ربي انى هبعده  
عن الوليه القرشانه ديه وهخلص من مرمرطتها لجوزها الشخشيخه .



أعوذ بالله من أصناف الرجالة دي

## (٧) جشع وضلال

مشواری المره دی كان غریب .. فالمفروض زی کل مره أروح علی شقه من الشفق وأدخل علی طول عالمطبخ .. لكن المره ديه ودونی علی مخزن كبير مداری فی حته شعبية قوی .. وبعد ما دخلت فی کذا شارع وكذا حاره حطونی داخل المخزن ده جنب فرن بوتاجاز قديم ومصدی والتراب علیه رقات .. رقات وقلت فی سرى: اخص عليك يا زمن .. كده ییجى الیوم اللی تترمی فیہ البت بویه الحبویه الرمیہ دیه .. أما صحیح ملکش آمان .. ولما انتبهت للمخزن اللی أنا فیہ لقیته کمیہ هائله من أشولة السكر وأشولة الدقیق وأشولة الرز .. دا بقى غیر کراتین الصلصة وکراتین الشای وکراتین الصابون ودى برامیل صغيرة وکبيرة ودى علب صفیح کبيرة ودى قزایز من کل نوع .. حاجات أشكال واللوان .. وشىء وشویات .. وقلت لئنفسى : لازم یا بت یا بویه ديه مخازن ووزارة التموین اللی بتوزع المواد التموینیة علی کل أهل البلد .. لكن ظنی مکنش فی محله لانى سمعت الحارس اللی مقیم فی المخزن یقول لواحد لابس جلیبه بلدی وعبایه سکروته وماسک فی ایده سبحه بیقلب حباتها بصوابعه من غیر معنی وشنبه فی وشه زى البرطوشه: تمام یا حاج سنقر کله تمام .. البضاعة وصلت وستفناها فی المخزن: الدقیق والسكر والرز والشای والصلصة والزیت والصابون وکله .. یعنی العملیة بالصلى علی النبی آخر حرنکش . وضحك الحاج سنقر بصوت أجش یدل علی أن الشیثه ما بتفارقش بقه ١٨ ساعة یومیاً وقال :

-شوف الشغل اللی علی أصوله یاواد یا زغله .. أدينا نفضنا السوق کله وجمعنا فی المخزن ده کل حاجه .. بکره یا حلو الحاجه بعد ما شحت من السوق حتزید الطاق طاқین وتلاته والناس حتجرى یمین وشمال وتبقى فی عرض شویة سکر ولا شویة دقیق ولا علبه صلصة أو صابونة .. وطبعا التجار حیيجوا لمخزن الحاج سنقر علشان یاخذوا اللی همہ عایزینہ ویدفعوا اللی احنا عایزینہ .. ضحك الواد زغله وقال بصوت عامل زى وابور الطحین :حلاوتک یا حاج سنقر حلاوتک یا أبو التفانین کلها .. أهو كده الشغل ولا بلاش .. قال الحاج سنقر اللی شنبه فی وشه زى البرطوشه: أهو یا دویک یا واد یا زغله نطلع من العملیة



جنگم القرفا فى جشعكم

دى بحتة الأرض اللي على ناصية الحاره ونجيلنا جوز عريبات زلمكه واكمل حقى الشرعى واجوز الرابعه وبالمره نعمل عمرة رجب ونزور النبى ونملس على شباكه .. صرخ زغلله وهو بيضحك وقال: اللهم صلى على كامل النور.. ولقيت نفسى حطق وحفرقع من الغيظ.. بقى ياراجل يا جشع يا ضلالى تلم المواد التموينية من السوق وتعمل أزمة فيها علشان تاخد فلوس حرام وتكسب من دم الناس الغلابة اللي مش لاقيه تاكل علشان تجيب حته ارض وتشتري زلمكات وتتجوز لرابع مرة وتروح تعمل عمره وتزور النبى .. دا النبى برىء منك ومن أمثالك اللي الجشع عامى عندهم.. وتمنيت انى انفجر فيه وفى حارس المخزن بتاعه علشان يدوقوا عذاب النار فى الدنيا قبل ما يتشو بيها فى الآخرة.. وفضلت فى المخزن الكتيب ده لحد ما خلص الغاز منى وطلعت من دنيا سنقر وزغلله اللي كلها حرام x حرام.



## (٨) سيدى الباشا

فى مطبخ واسع داخل شقة كبيرة بدأت مشوار من مشاوير حياتي الغازية.. ومنيت نفسي بقضاء وقت طيب مع أسرة طيبة.. فالشقة باين عليها العز والهنا.. واصحابها باين عليهم ناس مرححة ويظهر ان راجل البيت كان مركزه كبير قوى قبل ما يطلع على المعاش لان لقب الباشا ملازمه فى كل حته.. الباشا جه.. الباشا بياكل.. الباشا نايم.. وبيت العز ده مفهوش غير مرات الباشا إحسان هانم السناكحلى والباشا والبنت سنيه الشغاله بت كده مدلعه ومايصه من بتوع الشغلات الأيام ديه.. أما أولاد الباشا فكبروا واجوزوا وخلفوا شوية كتاكيت صغيرة بيزوروا جدهم الباشا وستهم الهانم مرة فى آخر كل أسبوع.. وقلت فى سرى إن شاء الله يا بت يا بويه تقضى كام يوم حلوين فى بيت الباشا ده.. لكن ما فيش فايده.. فالباشا بتاعنا رغم إنه قدام الناس حمش وشديد وراسم نفسه.. ورغم انه جد لكناكيت صغيرة إلا إنه مراهق من الدرجة الأولى ما يصدق إن إحسان هانم تروح مشوار وعلى طول يدخل عندنا فى المطبخ واقعد اسمع كلامه مع البنت سنيه المايصه :

- بت ياسنيه

- نعم يا سيدى الباشا

- أنا عايزك تجيبيلى حاجه من فوق الدولاب اللى فى الأوضه

- لآ.. لآ يا سيدى الباشا المره اللى فاتت قلتلى كده وكنت حقع من على السلم اللى

كنت ماسكهورلى

- يا بت متخفيش انا حمسك السلم كويس قوى.. ولا أقول لك بلاش السلم أنا حشيلك

بنفسى

- لآ عيب يا سيدى دا أنا تقيله عليك

- يا بت انتى لا تقيله ولا حاجه دا أنتى زى العصفوره

- ودى تيجى يا سيدى الباشا لحسن الست هانم تطب علينا

- ما تخفيش يا بت .. دى فين وفين لما تيجى .. وميت مره اقولك لما نكون لوحدنا

متقوليش يا سيدى الباشا

- آمال اقولك ايه يا سيدى الباشا

- تقوللى باسمى على طول سحتوت المفش

- مقدرش يا سيدى أنا بنكسف

- ما تنكسفيش ولا حاجه دا أمر منى

- أمرك يا سحتوتى

- الله .. سحتوتى دى طلعه من بقت زى العسل يله تعالبنى بقى ..

- طب وغسيل المواعين يا سحتوتى مين اللى حيشطبه .. دى الست هانم لو جت وأنا

لسه ما شطبتوش حتسود عيشتى

- ولا يكون عندك فكر .. أنا بنفسى اللى حغسل المواعين

- ما تحرمش منك أبداً يا سحتوتى - ولا أنا كمان يا سنونتى ..

ويقف الباشا بتاعنا يغسل المواعين والبت المايصه واقفه جانبه بترقصه وهو مزأطط

ويغنى : شكشك سنسونه تعالى جانبنى .. شكشك سنسونه تعالى جانبنى ..

وترد عليه البت سننيه : أنا جنبك أهو يا سحتوتى أنا جنبك أهو ..

وأنا عماله اسمع الكلام الفارغ ده وأقول في سرى : يا كسوفى .. يا حومتى - يا دى

الفضايح .. يا دى الجرس يا ولاد .. جتك واكسه يا سعادة الباشا بقى يا ناس الراجل الشايب

ده اللى الكل بيحترمه ويترعب منه ويقولو له يا سعادة الباشا .. والباشا راح .. والباشا جه ..



الباشا مراهقاً

حاسب الباشا نايم سعادة الباشا ده يعمل العمائل ديه اللي ما يعملهاش الشباب الصغير المراهق.. وابقى خايفه لحسن الست هانم تطب عليهم غفله .. وفعلا اللي كنت خايفه منه حصل قبل ما أمشى وأسبب البيت ده بيومين .. فمره خرجت الست احسان هانم السناكحلى زى عادتها لكن بعد شوية صغيرة رجعت البيت لانها كانت نسيت حاجه .. ودخلت المطبخ بصت لقت الباشا مشمر ايديه وواقف على الحوض وبيغسل المواعين وبيغنى :

- شكشك سنسونه تعالى جنبى .. شكشك سنسونه تعالى جنبى والبت سنبيه المايصه واقفه جنبه بترقصه وتغنيه : - أنا جانبك أهو يا سحتوتى .. أنا جانبك أهو ..

وصرخت إحسان هانم وقالت: يا مصبتي .. بتعمل أيه هنا يا باشا؟ ويتغنى بتقول إيه؟ وشهق الباشا شهقه كان حيرروح فيها وقال وهو بيتلعثم زى ما يكون عيل شافته أمه بيعمل حاجه غلط:

- أبدأ يا احسان .. أنا مظلوم .. أنا برىء .. دى البت سنبيه بعد ما خرجتى استفردت بيه وشربتنى حاجه أصفره ما حستش بعديها إلا وأنا واقف على الحوض وبيغسل المواعين .  
وطبعا كانت فضيحة بجلال انتهت بعلاقة سخنه للبت سنبيه وطردها من البيت ..  
وبعدها خرجت أنا كمان من البيت ده وأنا بقول : صحيح صدق اللي قال: من بره هالله هالله .. ومن جوه يعلم الله ..

## (٩) اللت والعجن x رمضان

هل علينا شهر رمضان كل سنة وانتم وأنا «بويه الحبويه» طيبين وبخير.. وقلت في سرى : خلاص يا بت بويه الناس في رمضان بيكونوا آخر تمام سواء في التصرفات أو في الكلام .. معلوم شهر مبارك بتتملى فيه الدنيا خير ورحمه وصوم وعبادة .. ولما ودونى شقة ناس صايمين منيت نفسى فيها بأيام حلوه .. لكن مفيش فايده .. يظهر أنا بختى كده .. بسلامتها صاحبة الشقة جتلها اختها عشان تقضى معاها كام يوم في رمضان .. ويقعدو هما الاتنين عندى ف المطبخ يحضروا المحمر والمشمّر وعشان الفطار .. وينعقد مجلس النميمة واسمع صاحبتنا بتقول لأختها :

-تتصورى يا سميحة يا اختى سنيه جارتنا غيرت شقتها كلها .. الأرضيه كانت باركيه شالنتها وحطط رخام مستورد .. وغيرت طقم المطبخ وطقم الحمام ولزقت ورق ملون على الحيطان ومدخل الشقه عملته سيراميك وخلت شقتها حاجة تانيه خالص ..

وتزد عليها اختها : دى على كده اتكلفت يا جى كام الف جنيه يا صفيه يا اختى ..

- خمستاشر الف جنيه يا حبيبتى .. جنيه ينطح جنيه ..

- يا نهار مش فايت .. خمستاشر الف جنيه .. ودول جابوهم منين يا صفيه يا اختى؟

- أنا عارفه بيحببوا الفلوس دى كلها منين دا جوزها موظف فى الشهر العقارى وهى قاعده فى البيت لا شغله ولا مشغله وعندهم اربع عيال ..

- بس .. بس .. بس دا ببقى جوزها من الموظفين هياهم اللى ما بيمشوش ورقه للناس إلا لما بيخدوا المعلوم

- والله عندك حق يا سميحة يا اختى دا بيروح الشغل وهو شاييل شنته فاضيه ويرجع وهى مليانه رزم رزم .. استغفر الله العظيم اللهم انى صايمه ..

- برية يا اختى برية من العالم اللى عايشه بفلوس حرام .. استغفر الله العظيم اللهم انى صايمة ..

- اسكتى .. اسكتى .. مش نوال اللى ساكنه فى الدور الرابع اشترى عريبه عالزيرى ..  
- ودول جابوا فلوسها منين همه روخرين ؟

- الظاهر يا حبيبتى إن جوزها بيتاجر فى الممنوعات .. استغفر الله العظيم .. اللهم انى صايمة ..

- اخص .. اخص .. اخص .. فى الممنوعات يا خى جته مصيبه .. استغفر الله العظيم اللهم انى صايمة .. وتعد الست صفيه واختها الست سميحه طول النهار فى المطبخ يلتو ويعجنو فى سيرة الجيران والناس ويقطعوا فروة اللى يعرفوه والى ما يعرفهوش وفاكرين انهم لما يقولوا: استغفر الله العظيم .. اللهم انى صايمة يعنى صيامهم مقبول عند رينا .. وإن مجلس النميمة والغيبة المنعقد سيئاته حتمسح بهذا الاستغفار .. وارتفع ضغط الغاز جوايا وكنت حفرق من الغيظ من صاحبة البيت واختها واللى زيهم اللى فاكرين إن صيام رمضان يعنى الامتناع عن الاكل والشرب ويس لكن سيرة الناس والكلام عنهم واتهامهم اتهامات تمس سمعتهم وكرامتهم فده مباح وتسالى صيام مادامو بيقولو بعد كل حدوته : استغفر الله العظيم .. اللهم انى صايمة .



صیامزی قلیته

## (١٠) اخوان الشياطين

فى مشوار من مشاويرى الغازية فى شهر رمضان المبارك خدتنى عيلة راجل طيب  
عرفت بعد كده انه موظف كبير فى الحكومة.. وسمعت الست بتاعته وهى بتقوله :

- اسمع يابو سامح .. احنا عايزين نعزم على الفطار النهارده سنيه اختى وجوزها  
وولادها الستة ..

- وماله يا عديله اعزميهم وأهو الاكل اللي فاض من عزومة امبارح يقضيههم ويفيض ..

- نعم .. نعم .. نعم بقى اخواتك وولادهم اللي عزمناهم امبارح نعملهم كل الأكل ده ..  
واخواتى أنا وولادهم يقطروا على الاكل البابت اللي فاض من اخواتك وولادهم ..

- مش قصدى يا عديله .. همه اخواتى واخواتك ايه .. مش عيله واحده .. أنا كل  
غرضى ان احنا نمسك ايدينا شويه فى المصاريف .

- بتقول ايه .. نمسك ايدينا شويه فى المصاريف .. طيب مقلتش الكلام ده امبارح ليه  
لما عزمنا اخواتك وولادهم ..

- يا عديلة اسمعى ..

- ما بسمعش ..

- يا عديله افهمى ..

- ما بفهمش .. عزومة اخواتى وولادهم تبقى زى عزومة اخواتك وولادهم وتكون  
احسن كمان ..

- طيب واكل امبارح نرميه .

- نرميه نشيله .. ملليش دعوه ..



قمة التبذير والاسراف

- لكن دا يبقى تبذير يا عديله .. وربنا بيقول : «إن المبذرين كانوا إخوان الشياطين» ..  
وقعدت الست عديله تضغط على ابو سامح علشان عزومه اخوتها وولادهم .. وهو يحاول  
معاها يمين وشمال وهي راسها أنشف من الحجر الصوان اللي بنو بيه السد العالى .. وآخرة  
التمه يا حبة محبسى رضى ابو سامح غصب عنه بطلبات الست عديله .. واتعمل أكل  
كفى كل اللي اتعزموا وفاض قده مره ونص ..

والاكل اللي فاض من العزومه الاولنية مبقوش عارفين يودوه فين لان التلاجة والنملية  
والبوفيه وحتى دولاب الهدوم كانوا مليونين على الآخر وطبعاً أكل كتير اترمي فى الزبالة ..  
وقلت فى سرى : آه لو كنت بتتكلمى يا بت .. يا بويه .. كنتى قولتى لأم سامح واللى زيها :  
حرام عليكى التبذير ده كله .. وأحنا فى شهر الصوم والعباده .. مش فى شهر الأكل والتبذير.



## (١١) لاهياة لمن تنادى

واحنأ فى شهر رمضان المبارك خدتنى عيله فى شفتها علشان اشتغل كام يوم عندهم .  
والحق يتقال أول ما دخلت الشقة لقيت الهدوء والنظام آخر حلاوة وقلت فى سرى : يا هادى  
عليك اعتمادى .. والله حترتاحى يا بت يا بوبه كام يوم فى البيت الهادى الجميل ده ..  
واستغريت مع مرور الوقت على الهدوء الزايد على اللزوم ده ايه يا جماعه انتم مش بتفطروا  
على المغرب زى الناس الصايمة ولا ايه ؟

ورغم احساسى إن العيله دى كبيره ما شاء الله عليهم لكن مش سامعه صريخ ابن يومين  
.. وعرفت السبب .. اتاريهم كلهم بربطة المعلم نايمين سطحه طول النهار .. ويدوبك قبل  
المغرب بنص ساعة يصحو كلهم من النوم والسويقة تشتغل دا رايح ودا جاى ودا بيزعق ودا  
لسه نعلان .. وقبل ما المدفع يضرب بدقايق الاقى الأكل جلمهم جاهز من المطعم القريب من  
بيتهم .. الله .. يعنى ما يطبخوش .. وهمه يعنى هيطلبخوا امته وهمه طول النهار نايمين ..  
القصد .. أول ما المغرب تقول الله اكبر ينزل الجيش ده على الأكل حتتك بتتك .. ولما يخلصوا  
أكل ابتدى اسمع صوت التليفزيون أد كده يسد الفنيه فى المنظم بقاعى .. دى أشى اعلانات  
.. ودي أشى فوازير ودي أشى مسلسلات .. ودي أشى برامج بالعربى والإنجليزى وبالاوندى  
ويكل اللغات الحية والميته .. الحلوة والمزقته .. ولما تنتهى برامج التليفزيون وحلقاته  
ومسلسلاته الخطيبته ديه .. يبدأ نادى الأسرة يشتغل .. دول بيلعبوا كتشينه ودول بيلعبوا  
طاولة ودول بيلعبوا دومنه .. واسمع واحد فيهم بيصرخ : الله اكبر جبت دبش ومسكتك فى  
اليك يا حلو وعلى رأى المثل أمسك فى اليك وعك عك .

ويرد الثانى عليه : بس حرص عليه يا جميل .. فاكر امبارح لما مسكت فى اليك وهبدك  
أنا خشب .. ويرد عليه الأولانى : الكلام ده تقولو فى القسم .. أنا اللى هاخذ العشرة ديه وهاخذ  
الكاس .. مادام بتلعب على الكاس .. يبقى أنا اللى حكسب .. حماس الكاس يابو عباس .. ووا سمع  
صوت ولد صغير بيصرخ بسرعه : بطل غس يا سى بابا بقى بتاكل بالسايب وتقول عليه

ولد.. ويضحك ابوه ضحكة عيال ويقول : يا واد يا حسين يا مجرم الشايب ده كان السنه اللي فاتت ولد وبعدين شاب السنه ديه زى ما شاب أبوك.. وفى وسط الزيطه ديه سمعت واحد بيدعى وبيقول : يارب .. يارب.. قلت فى عقل بالى الحمد لله إن فيه واحد فى البيت ده بيدعى ربنا فى ليل رمضان المبارك.. لكنى سمعته بيكمل الدعاء ويقول : يارب .. يارب أجيب شيش بيش علشان أمسك فى الخشب وأخذ العشرة ديه.. وأخذ معاها الكاس..

وقلت فى سرى : ياخى جتك وكسه تخليك لا تعرف ليل من نهار وتقول على الباميه مهليه مش خضار.. بقى هو ده الدعا اللى الواحد يدعيه فى الشهر المفترج ده.. طب قول يا رب اغفرلى ذنوبى وزود حسناتى.. مش تقول يارب امسك فى الخشب.. حظوك على خشبه يا بعيد لا توعى ولا تستوعى..

ويفضل الحال ده طول الليل والبوتاجاز وأنا شاغلين على طول ما بنهمدش دا شأى .. دا قهوه.. وعنهما يروح أهل البيت كلهم فى سابع نومه طول النهار وما يصحوش إلا على المغرب .. وتكرر الإسطوانة دى كل يوم.. وأبقى عايزه اصرخ وأقولهم: يا ناس يا هو.. ده رمضان شهر القرآن.. هو ده الصوم اللى شرعه ربنا هداية واحسان فىين العمل؟ فىين العبادة؟ فىين الموعظة من الصيام؟ فىين نعمة الاحساس بالجوع والعطش زى الفقير ما بيحس ويشعر؟ فىين .. وفىين.. لكن أقول لمين.. ومين يسمعنى.. دول كلهم نايمين زى القتله.. مفيش فايده من الكلام.. لا حياة لمن تتادى..



هي دي العبادة في رمضان

## (١٢) اخص على الفاطرين اخص

فى مشوار من مشاويرى الغازية فى شهر رمضان المبارك لقيت نفسى فى بيت واحد وزوجته والظاهر إنهم فى بداية حياتهم الزوجية .. وحسيت بتفاؤل كبير بيهم .. وعرفت ان الزوج اسمه اسلام وعروسته الحلوه اسمها إيمان .. وقلت فى سرى : يا سلام يا بت بويه .. إيه الهنا اللى أنتى فيه ده .. قاعده مع اسلام وايمان فى شهر رمضان .. دى حاجة آخر نظاجه .. لكن نقبى طلع على شونه .. فابسلامته سى اسلام اللى جسمه زى الحصان الإنجليزي مهما يرمح يقولك ما تعبتش يا عزيزى .. واللى فيه صحة تهد بلد بزيتها .. فاطر وما بيصممش شهر رمضان !! ليه كفى الله الشر؟ قال ايه علشان سعادته بيشررب سجاير وما يقدرش يستحمل فراق السجارة من الفجر للمغرب!! جتها خيبه اللى عايزه خلف .. واللى حيفقع مرارتى .. قصدى فنيتى .. إن السنيوره برضه فاطره وما بتصممش فى رمضان .. قال ايه علشان الصوم بيأثر على صحتها وجسمها الرقيق .. ياختى جتك خيبه عجب ما تعرفيش تفرقى بين أمشير ورجب واللى حيجيب لمحبسى نقطه ولخرطومى انبجاج كشميرى إن الست هانم اسمها إيمان .. وفى عز نهار رمضان اللى فيه الكل صايم كبير وصغير الاقى النبى حارسه وصينه يولع السجارة من سيجارة ويشرب كوباية الشاى ورا كوباية الشاى .. والغندورة عروسته رينا يصنها ويحميها لشبابها عماله تلغ فى الأكل لغ واسمعهم وهو بيتسهرها ويسلوا فطارهم :

-الواحد فى رمضان ده تعبان قوى يا أمونتى يا حبيبتى ..

- عندك حق يا سلمتى يا حبيبتى .. أنا حاسه أنى خسيت النص عشان الواحد ما بيكلش براحتة ..

- لازم الواحد يستحمل يا حبيبتى .. وأهو العملية هانت فات أكثر من نصه

- طول ما أنتى جانبى أنا استحمل كل شىء يا حبيبتى ..



حسبي الله ونعم الوكيل

- مرسى يا روىى .. ابقى افنكرى يا امنتى يا حبيبتى بعد ما نتفرج على فوازىز  
رمضان والمسلسل وفيلم اللىلادى نروح عند أونكل حسن اصله عازمنا على السحور  
النهارده .. وحناكل عنده فول بالكريم شانتيه ..

- من عنيه يا سلمتى يا حبيبى .. ياي فول بالكريم شانتيه دا حيبقى سحور فانتاستيك ..

ويكمل البيه سجارته وكوبايه الشاى وتكمل الهانم اكلها ودلعها واقول فى سرى:

آه يا نارى وآه يا غازى لو بتكلم كنت صرخت فيهم وقتلهم:

- عيب عليك يا اسلام بيه وعيب عليكى يا إيمان هانم .. عيب عليكم نطفروا فى شهر

رمضان شهر الصيام والله خساره فيكم اساميكم .. خساره فيك اسم اسلام وخساره فيكى اسم

ايمان .. اخص عليكم يا قولالات الدين .. اخص والف اخص .. واكررها واقول ليكم ولكل

الفاطرين فى رمضان من غير عذر .. اخص على الفاطرين اخص ..



## (١٣) أصحاب العقول x نعيم

قبل ما يخلص شهر رمضان المبارك والعيد على الأبواب كل سنة وأنتم وأنا «بويه الحبويه» وكل حبايينا بخير وصحة وعافيه لقيت نفسى عند الست أم سماعين .. مين أم سماعين؟ ست مصرية دقه قديمة .. وأول ما دخلت مطبخ أم سماعين لقيت البت قوعه شغاله فى المطبخ (البت قوعه دى انبويه بوتاجاز زملى شفتها أول مرة فى مستودع أنابيب وكانت لسه مهبوده على الرصيف الأسفلت حته هبده خلتها ما تعرفش الفرق بين الخيار والحمار .. فيقت مفقوعه من جنبها علشان كده أنا من ساعتها بدلعتها وقلها يا قوعه) وقتلتها:

- بت يا قوعه لما انتى بتشتغلى فى مطبخ أم سماعين ولسه الغاز جواكى جاييينى أنا  
أعمل إيه؟

- مين .. البت بويه .. وحشتينى يا مجرمه .. إيه أخبارك وفين اراضيكى؟

- اخبارى هي اخبارك .. احوال البيوت اللي بنرحها كل كام يوم لا تسر عدو ولا حبيب .. لكن مقلتليش يا بت يا قوعه جابونى هنا ليه وانتى لسه شغاله وما خلصتيش .

- شوفى يا بت يا بويه أنا لما جابونى هنا لقيت البت ليفه شغاله برضك وسألته نفس  
السؤال .

- استنى .. استنى .. البت ليفه دى مين؟

- البت ليفه اللي كانت واقفه معانا فى المستودع .. البت المصديه اللي عندها تليف فى  
المحبس بتاعها .

- أيوه .. أيوه .. افكرتها .. مش هي البت اللي ما بيعشلهاش غاز ودائما بتنفس وهي  
واقفه ..

- هي بعينها .. قصدى هي هي بمحبسها .. وفهمتني البت ليفه إن أم سماعين بقلها

سبع تيام بليااليهم شغاله ليل ونهار بتعمل كحك العيد والغريبه والبسكوت والقرص والمنين والشريك وشيء وشويات .. صوانى صوانى طالعه من الفرن .. وصوانى داخله للفرن ..

- يا مصيبتى .. سبع تيام شغاله ولسه انتى وأنا حنشتغل كمان كام يوم علشان الكحك والغريبه والبسكوت وغيره وغيره .. دول باين عليهم ناس أغنيا قوى ومقتدرين ..

- أبداً وحياة غازك يا بويه .. دول لا أغنيا ولا مقتدرين .. دا ابو سماعين موظف درجه ستاشر

- موظف درجه ستاشر يا مثبت الخرطوم فى المحبس .. وعرفتى منين الكلام ده يا بت يا قوعه ..

- اصلى عرفت من كلامه لأم سماعين إن البدلة الوحيدة اللي عنده قلبها وعدلها ستاشر مره ..

- طيب ولما همه ناس كحيتى بالشكل ده .. جابو منين الفلوس اللي تخليهم يقعدو نص شهر رمضان يعملوا كحك وغريبه وبسكوت ومنين وقرص وشريك؟

- أنا عرفت من البت ليفه إن أم سماعين خلت أبو سماعين يستبدل شويه من معاشه وياخذ سلفه من شغله .. وحتى البت ليفه سمعتها بتقول لجوزها:

- لازم يا بو سماعين تعمل استبدال لشويه من معاشك علشان مصاريف العيد ..

- بس يام سماعين انتى عارفه إن احنا مذنقين حبتين ..

- ايوه يابو سماعين احنا صحيح مذنقين حبتين لكن زنقة العيد ملهاش حل .. عايزين نعمل كحك وغريبه وبسكوت علشان نفرق على الحبايب ونكيد العوازل .. وعايزين نعمل قرص ومنين وشريك علشان نطلع الارافه أول يوم العيد ربنا ما يقطعلناش عادة .. وعايزين ندى العيدية لعيالنا وعيال جيرانا .. وعايزين وعايزين ..



أم سماعين في العيد...

وزاد ضغط الغاز جوايا بشكل خطير وقلت فى سرى :

- يا نهار كحلى وشبابيكو بنى على أسود عليكى يا أم سماعين .. بقى تبقو ناس على أدوكو وجوزك موظف درجه ستاشر وتخلى الراجل جوزك يبدل شويه من فلوس معاشه علشان تعملى كحك وغريبه ويسكوت علشان تكيدى العوازل يا شيخه حرام عليكى .. وأرافه ايه اللى تطلعها بالقرص والمنين والشريك اول يوم العيد .. بقى رينا سبحانه وتعالى عامل العيد علشان الناس تفرح وتنبسط وانتم تروحو الارافه وتعدوا تعيطوا فيها .. ايه الحال المتشألب ده .. ثم هتدى عديه لمين ولا لمين .. يا شيخه حرام عليكى قلة العقل دى .. صحيح أصحاب العقول فى نعيم .



## (١٤) سياسة قوعه

الأيام دى الدنيا مهياش سيعانى من الفرحة.. وروحى الغازية فى السما وقلت فى سرى : ايه الزأططة والشكحة اللى انتى فيها دى يابت يا بويه.. الناس حتجنن عليكى وعلى صحباتك الأنابيب.. قال ايه فيه أزمة فينا.. والكلام ده محستش بيه الا لما اتملينا آخر مره زى العادة وودونا على المستودع علشان نتوزع منه على البيوت.. وأول ما نزلت أنا وصحباتى من العربية جوه أرض المستودع لقيت أمة لا إله إلا الله واقفة على باب المستودع.. ناس ما يعلمش عددها غير خالقها واقفين طوابير طوابير أولها عندنا وآخرها على حدود موزنبيق.. ريك والحق أنا أول ما شفت المنظر ده انه رعت حطة دين هرعه

وقلت : يالهو بالى هى الحروب العالمية الغازية قامت ولا ايه يا ولاد.. وفهمت من البت قوعه والبت ليفه صحباتى الحكاية.. قال ايه فيه أزمة فى انابيب البوتاجاز.. قتلهم: طيب فهمونى بالعقل قصدى بالمحبس.. منين تيجى الازمة ديه اذا كان الغاز اللى جوانا ده من ارضنا وعندنا منه بالزوفه ومش بنستورده من بلاد بره.. ردت عليه البت قوعه وقالت : يا بت يا بويه يا عبيطه.. الجماعة اياهم بيقتلوا الازمات لمصلحتهم الشخصية علشان يكسبوا منها وكمان يخلوا الناس ما يفكروش إلا فى ضروريات أكلهم وشربهم.. وكنت حفطس على غازى من الضحك لأن البت قوعه المفقوعه بتتكلم فى السياسة وقتلتها : بت يا قوعه ايه الكلام الكبير ده اللى بنقوليه.. اتعلمتية منين؟

قالتلى : انتى فكرانى يا بويه جهله.. أنا اشتغلت عند ناس كثير من الحزب اياه وفهمت اللعبة كويس.. وعلى كل حال ده برضه لصالحنا.. أدى انتى شايفه الناس هتموت نفسها علينا ازاي.. وفعلا لقيت الناس دى كلها بتبصلنا من بعيد وعينهم يا حبة محبسى حتطلع علشاننا وكل شوية تقوم خناقة بين الناس اللى واقفه فى الطوابير واسمع منهم كلام عجب:

- يا عم انت روح أقف فى آخر الطابور.

- أنا مكانى هنا وأنا واقف فيه من الصبح.

- لأ.. أنت لسه جاى وعايز تاخذ مكان غيرك..
- لأ بقى.. أنا واقف هنا من قبل ما تيجى أنت..
- قبل ما آجى أنا.. أمنك صحيح راجل كداب..
- د أنت اللي كداب وستين كداب كمان.. وقليل الأدب.
- قليل الأدب.. أمنك صحيح راجل شايب وعايب.
- أنا شايب وعايب طب خد..

وتقوم بنهم خناقه لرب السما وناس تزعق وناس تصرخ وناس تتبهدل وناس تتعور  
وستات تصوت وستات تانيه تزغرط..

واقعت اتفرج على الناس اللي حيقطعوا بعض علينا واقول فى سرى : هم يضحك وهم  
يبكى.. المهم جت قرعتى من نصيب واحد بيه محترم راح شايلنى والفرحه حتنط من وشه  
زى ما يكون اتجوز ملكة جمال الباميه.. وبقيت فطسانه على غازى من الضحك لما لقيت  
الديه المحترم اللي شايلنى وهو بيهتف من فرحته ويقول: الله اكبر.. يحيا العدل.. يحيا العدل  
.. ظهر الحق أخيراً.. ظهر الحق.. سيعود الطيبخ للبيت.. فى بيتنا طيبخ.. فى بيتنا طيبخ..  
الطيبخ التام أو الموت الزؤام..

وجتنى حالة من الضحك والانشكاح الهستيرى من هتاف البيه المحترم اللي شايلنى  
ده.. واللى زود الحالة اللي عندى دى اكثر واكثر لما افكرت ان البت قوعه المفقوعه كانت  
بتتكلم فى السياسة.



سياسة البوتاجاز والطبخ

## (١٥) معركة الدرحة الكبرى

اللى شفته فى مشوارى المره دى لا شافو عدو ولا حبيب .. ولا يقدر يصلحه مهندس ولا طبيب .. أصل اللى حصل شىء غريب وعجيب ما يحصلش فى بلاد تركب الأفيال ولا فى بلاد تلبس النسناس صديرى وسروال .. ، تسألونى : إيه بس اللى حصلك يا بويه وأنتى عامله فى كلامك زى ستنا العجوزه الكركوبه .. أنا حقولكم أهه:

الناس اللى كنت عندهم آخر مرة لما خلص الغاز اللى جوايا استنوا عريبه الغاز تمر على البيوت علشان يغيرونى بواحدة زميلتى مليانه .. وعلشان كانت لسه أزمة أنابيب البوتاجاز ما انتهتس ما جتس العريبه .. وهمه يا حبه محبسى مزنقين زنقه فرنساوى يحتا معاها الحنجى والضلالى .. لا عرفين يطبخو ولا يشربوا شاي ولا يعملوا حاجه خالص .. ويقوا يبصولى كل بصره ويصه كلها ضيق وأرف وعدم احترام علشان أنا من غير غاز بقيت زى قلتى .. أنا «بويه الحبويه» اللى أول ما جيت عندهم مليانه غاز كانوا فرحانيين بيه ونقصين بيسونى بوس أنا اللى اشتغلت عندهم اكثر من ثلاث أسابيع بلا كلل ولا ملل .. اخدمهم فى الليل قبل النهار تكون مشاعرهم ناحيتى بالشكل ده .. غايته .. فى يوم سمعت الست أم توفيق بتقول لابنها:

- واد يا تيفه .. احنا حنقعد مستنين عريبه البوتاجاز كده يوم ورا يوم وهى إن شاء الله لا حتمر علينا ولا حتسأل فينا ..

- طيب وأنا حعمل إيه يا ماما .. ما أنتى عارفه إن فيه اليومين دول أزمة فى الأنابيب .. حنعمل إيه ؟

- نعمل إيه !! تاخذ الزفته ديه (عليه أنا بويه الحبويه .. جتك واكسه يا أم تيفه تخليكى متعرفيش تفرقى بين الصابونه والليفه) اللى قعدلنا كده زى العمل الرضى وتروح تغيرها من المستودع اللى فى الميدان الكبير ..



كفاية دحرجة.. جتك وكسة

- يا خبر يا ست ماما عيزانى آخذ الزفته دى واروح بيها للميدان الكبير واقف فى الطابور اللى ملهش نهاية وارجع بواحدة تانيه مليانه حرام عليكى يا ماما.

- حرمت عليك عشتك يا تيفه يا ابن ام تيفه أمال يا واد هطبخلكوا إزاي؟

- لا يا ست ماما البتاعه ديه ثقيله قوى وزى الرزبه مقدرش اشيلها وهى فاضيه أمال ازاي حشيلها وهى مليانه؟

- ما تشلهاش .. زقها .. تخرجها .. خدلها تاكسى .. وأنا حديك أجره التاكسى جنبه رايح وجنيه جاى دا غير كمان جنبه ليك أنت.

- طيب ما تخليهم اتنين جنبه يا ست أم تيفه علشان تندب العزيمه فى عضلاتى المفستكه

- موافقه يا تيفه يا ابن ام تيفه حديك فوق اجرة التاكسى اتنين جنبه .. حار ونار ..

وقلت فى سرى : الحمد لله يا بت يا بويه انك حتمشى من البيت ده بدل ما كل واحديصلك بصه كده مش هيه ..

وخذنى تيفه على الشارع بعد ما خبط فلوس التاكسى والاتنين جنبه فى جيبه وراح حططنى على جانبى فى الشارع وقعد يزقنى برجله زى الكوره تمام وأنا اسم الله على مقامى بدحرج على الأرض شويه وأقف شويه .. يروح زاغدى تيفه برجله حته زغده يخلينى ادحرج شويه كمان .. وقعد تيفه إلهى لا يكسب ولا يريح على الحكاية ديه .. يزقنى برجله اليمين مره وبرجله الشمال مره وأنا بدحرج فى الشارع على التراب وعلى الزلط والطوب وده كله كوم وصدماى العنيفه مع الرصيف كوم والصوت اللى طالع من الصدمات ديه زى ما تكون صفارات انذار تعلن عن بداية حرب المعيز .. وابقى عايزه أصرخ وأقول :

ياناس يا هو .. هو أنا كوره يتلعب بيه فى الشارع بالشكل ده .. اخص عليك يا تيفه اخص لو كانوا فى البيت وفى المدرسة علموك ازاي تحترم نعمة ربنا ما كنتش عملت كده لكن دلوقت يظهر



إن لا البيت بيريى ولا المدرسة بتريى .. وعلى رأى المثل : مالك متريى .. قال من عند ربي ..  
القصء قعدت ادحرج ادحرج وأنا خايفه على محبسى يحصله حاجه من كتر الصدمات .. ودخت  
وتعبت من كتر الدحرجه والمرمطه ديه ومن الخبطات اللى جت فى جسمى .. واصبت بجميع  
الامراض الغازية والنفسية ومنها على سبيل المثال لا الحصر اكتئاب غازى - شيزوفرنيه فلاحى -  
اضطرابات محبسية - دحرجة زفتيه - انطواء موزمبيقى - تعاسه كولومبيه - مراره اسطنبولى -  
ضيق رومى - بعجره سودا - استفسفس فى الحمبلاص - استكه فى اللابوريا - ارتصه فى  
الشفنخير .

واستمر الواد تيفه ابن ام تيفه فى معاملتى المعاملة المهينه ديه لحد ما وصلنا للمستودع اللى  
فى الميدان الكبير وهناك عينكو ما تشوف إلا النور زحمة وطوابير ملهاش نهايه وأول ما دخلت  
المستودع حمدت ربي إن معاناتى مع الولد تيفه الطايش ده انتهت وقدرت أصعد صمود الأبطال  
فى معركة الدحرجة الكبرى .

## (١٦) لمؤآخذة يا حاج

رحلتى المره ديه فى بيت الحاج قرنى الهلف .. وعرفت من الكلام اللى كنت بسمعه إن الحاج قرنى غنى قوى وجاهل قوى وهلف قوى قوى .. وسمعت كمان ذكريات لناس قريبين منه انهم كانوا بيشوفوه زمان وهو حافى وجلبيته اللى لابسها ليس لها لون لكن لها رائحة يمكن ان تنافس رائحة الغازات الكيمايية الحربية فى الحروب العالميه والمحليه لتبيد جميع الكائنات الحيه الإنسانيه والحيوانيه والنباتيه وكذلك المواد الصلبه الفلزيه واللافلزيه .. وسمعت من الناس دول شويه الفاظ لكن مقدرتش أفهمها زى: بورسعيد .. المنطقه الحره .. تهريب بضايع .. عمليات نصب واحتيال .. وغيره وغيره .. لكن اللى قدرت افهمه إن الهلف جمع فلوس كتير بطرق مافيهاش ريحة الحلال .. وإنه ما حجش ولا حاجه .. دا مره شافوه ماسك فى ايده سبحة راح سموه الحاج .. وانه لايعرف يقرأ ولا يكتب ولا يبصم حتى .. وفى يوم من ذات الأيام جاله صاحبه بريمه الفهلوى وقعدو الاتنين عندى فى المطبخ وسمعت الكلام اللى دار بينهم:

- انتخابات ايه دى بس اللى ادخلها يا بريمه ومجلس ايه ده بس اللى اتعين فيه؟ هو أنا بعرف اقرا ولا اكتب .. دا أنا كده بالمفتشر .. طور الله فى برسيمه ..

- لمؤآخذة فى ده الكلام يا حاج قرنى .. أنت محبها قوى لمؤآخذة ..

- مش الغرض يا بريمه .. بس ربنا عرفوه بالعقل .. لما تيجى تقولى حته تهريبه أقولك ماشى .. حته تزوير ولا نصب أقولك على البركة .. لكن تقول مجلس أقول لك يفتح الله .. المجلس ده عايز ناس بتقرأ وتكتب وتفهم وتاخذ وتدب فى الكلام .. وأنا زى ما أنت راسى فى الحاجات ديه ميج .. بلاطه .. ماشفر ..

- لمؤآخذة بقى يا حاج قرنى .. إنت لمؤآخذة مبهرج المسائل حبتين .. ومقشخر السوست

سوستين ..



قرنی الہاتف انا !!!



- ليه ياسى بريمه هو أنا حفسل أكثر بياضا .. الله يرحمك يامه ..

- الف رحمه ونور لموأخذه .. كان الواحد يعرف الهدوم اللي غسلتها من عشروميت هدمه فى الحته لموأخذه .. على فكرة .. لموأخذه وبدون مقاطعه لما تخش المجلس لازم تطالب مجلس الأمن بمنح الست والدتك لموأخذه لقب «أم كرنى انترناشيونال» لموأخذه ..

- أنت كده حطلها فى دماغى يا بريمه ..

- خايها تطلع وتعشش فى دماغك يا حاج لموأخذه .. والله شكلك كده حتنولها يا حاج لموأخذه ..

وقعد بريمه الفهلوى يقنع الحاج قرنى الهلف بالترشيح فى الانتخابات ودخوله المجلس .

وأنا بقول فى سرى :

يالهوى يا مستهوى .. ويا خرابى يا عرابى .. بقى الهلف ده الناس حتننخبه ويعينوه فى المجلس .. طيب ليه ؟ وحيعمل ايه ؟ يدخل علشان يصقف ويوافق وينام .. دى مصيبة ايه دى ؟ وراهننت نفسى وحلفت وقلت : وحياة غازك يا بويه .. إن شاء الله تسريبه بدرى .. الهلف ده ما هو ناجح ولا حيشوف بعينه طرطوفه من المجلس .. آمال فين الناس ؟ ووعى الناس ؟ ونزاهة الناس ؟ وفى نفس اليوم اللي مشيت فيه من بيت قرنى الهلف خسرت الرهان لأن لما طلعت من البيت لقيت أمة لا إله إلا الله واقفه على بيت الحاج وهى بتصيح وتقول :

قورانى .. قورانى .. هو .. هو

قورانى .. قورانى .. هو .. هو

- وفى عز الزحمة سمعت صوت بريمه الفهلوى ملطع وييقول :

- مش قلنك شكلك كده حتنولها يا حاج قرنى وآدى أنت نلتها لموأخذه بالقوى ايدك على كام باكو وكام أستك لزوم الرشرشه والبهوآه والزأططه لموأخذه يا حاج .

وسمعت الحاج قرنى الهلف وهو فى دنيا تانيه ويكلم نفسه ويقول :

- اصقف واوافق وأنا .. اصقف واوافق وأنا .. اصقفوا و.....

## (١٧) أحزان رومه

لما خدوني على المخزن آخر مره علشان يعبوني بالغاز وعملوا عليه وعلى كل صحباتى الأنابيب كل الاختبارات اللى تأكد سلامتنا رجعوننا فى العربية الضخمة بتاعتنا للمستودع علشان كل واحد فينا تروح مشاورها المعتادة .

واحنا رايعين على المستودع شفت صحباتى .. البت قوعه (المفقوعه من جنبها) والبت ليفه (اللى عندها تليف فى المحبس) والبت رومه (اللى البارومه والصدأ اكلوا رقات من جسمها) . وسلمت عليهم وسلموا عليه بأشتياق كبير:

- ازيك يا بت يا قوعه .. وأنتى يا بت يا ليفه والله وحشتينى .. بت يا رومه يا مجرمه أنتى لسه زى ما أنتى مصديه وفنيتك مهره ..

ردت قوعه: - مين؟ البت بوبه الحبويه .. فينك وفين اراضيكى دلوقت؟

وردت ليفه: - والله دا أنتى اللى وحشتينى يا بوبه ووحشنى كلامك اللى زى نسمة الغاز اللى بدرجة ممتاز .

واستنيت ترد عليه رومه لكن أبدا ما قاتش ولا كلمه .. وقلت فى سرى: بس دى زعلت منى ومن كلامى الثقيل حبتين وقتلتها:

- ايه يا رومه يا اختى .. انتى زعلتى منى لما قاتلك إن انتى مصديه وفنيتك مهره دا أنا كنت بهزر معاكى .. خلاص أنا بعد كده ما عدتش أهزر معاكى ..

كل ده ورومه ما بتتردش عليه .. ولقيت قوعه بتقول:

وحياة غازك يا بوية سيبى رومه فى حالها دا اللى فيها مكفيها

- ليه كفا الله الشر يا قوعه .. مالها رومه؟

- أصل يا حبيبتي صحبتها اللي زيتها تمام (اللي كان الصدا واكل من جنتها رفات  
برضه زى رومه .. تعيشى أنتى ..

- ايه ؟ طلعوها على المعاش وودوها الفرن الكبير علشان تسيح ؟

ونطقت رومه لأول مرة وقالت:

- يا ريت يا بويه يا حبيبتي يا ريت .. ما كنتش زعلت عليها ولا بكيت ..

- امال حصل ايه لصحبتك يا رومه .. قولى ما تخبيش وعليه ما دريش ..

- أقولك ايه بس يا بويه واعدلك ايه!! أصل اللي حصلها لا يتقال ولا يتشرى ولا ينكتب  
ولا يتقرا ..

- وبعدين معاكى يا رومه ما تقولى بقى ايه اللي حصل سيبتى الغاز فى محبسى

- انفجرت يا حبيبتي .. انفجرت وهى لسه بنت سبعناشر سنة انفجرت وراحت تسعميت  
حته .. كل حتة فيهم أصغر من السمسمه ..

- تسعميت حتة!! يا لهو بالى يا لهو بالى على جرا لصحبتك يا رومه وعلى اللي  
هيجرالى

- هيجرالك انتى يا بويه .. بعد الشر عليكى يا بويه دا انتى بنت امبارح .. قولى بالهو

بالى على اللي هيجرالى أنا .. لأن أنا والمرحومه من سن واحد .. احنا التنتين اشتغلنا سوى ..  
نفس الاستهلاك .. نفس الشقى .. نفس الصدا .. العمر الافتراضى بتاعنا يا حبيبتي خلص من  
زمان .. وهى أهى راحت وارتاحت من الدنيا وبلوبها والهيم اللي سببه الناس ليها .. والدور  
والباقى عليه أنا .. أهى .. أهى ..

وفضلت رومه تعيط والغاز على طول طالع من محبستها أصل يا حرام ما بيعشلهاش غاز

خالص .. حاجه كده تسد النفس والمحبس والفنيه ..

- طيب بس بس بقى يا رومه . بس وعلى اللى حصل رسينى وعلى اللى جرا فهمينى ..

- حاضريا ستى أنا حرسيكى على اللى حصل .. فى اليوم المشثوم ده رحى أنا والمرحومه فى عربيه واحده لحته واحده .. واتوزعنا فى حاره واحده .. أنا رحى عند الست أم كيداهن والمرحومه راحت عند الست أم زغول .. ، مفيش يا حبيبتى ساعتين زمن إلا وصوت انفجار هز الدنيا من حولينا وقلت فى سرى: يا مصيبتك يا رومه دا يظهر حرب أم المعارك قامت تانى ومعاه خاله المعارك وعمتها وسلفتها ومرات ابوها .. وعنهما والصويت والصراخ اشتغلوا فى الحته .. وعرفت من كلام عيلة أم كيداهن بالمصيبة اللى حصلت .. المرحومه كان جسمها متاكل من الصدا ومحبسها مفوت من زمان وأول ما تحطت فى المطبخ جنب فرن سخن قوى جسمها ما استحملش وراحت مفرقه وخذت معاهها أم زغول وأبو زغول والواد زغول واخواته: هدهد وحمامه وصقر وبلبل وعصفور .. والبيت بتاعهم اتهد وبيوت الحاره كلها اتبعجرت من شدة الانفجار وبقت آيله للسقوط .. إهىء .. إهىء ..

- بس يا رومه يا حبيبتى بس .. كفايه عياط قطعنى خرطومى وسديتى فنىتى ..

- الاكاده احنا لسه صغيزين لكن السبب فى استهلاكنا بسرعة معاملة الناس لينا .. دول بيهدلوا وميرمطوا فينا ومش بيحافظوا علينا من الرطوبة ومن الصدمات ومن اى شىء يعرضنا ويعرضهم للخطر ..

وسبت صحباتى قوعه وليفه ورومه وأنا نفسى اصرخ وأقول :

يا ناس حافظوا علينا علشان نحافظ عليكم .. عملونا كويس علشان تاخدوا خيرنا وربنا يكفيكم شرنا .. احترموا استعمالنا علشان نخدمكم طول حياتكم وحياتنا ..

ولمحت وأنا ماشيه وساييه المستودع وساييه المستودع رومه وهى مكتبه وحزينه ..  
وسألت غازى: ياترى هى حزينه على صحبتها ولا على نفسها .. ولا على الاتنين ..

الله أعلم ...



كفاية أحزان يارومه...

يوميات

# بمناسبة الاحتفال باليوم

الدكتور علي راشد



الجزء الاول

## (١٨) الحقونا يا وزارة الصحة

شفت العجب فى مشوار من مشاويرى الغازيه اللى ملهاش آخر.. فلأول مره فى حياتى الغازية أروح مستشفى من المستشفيات الحكومية.. أصل عم حسين التمرجى عنده بوتاجاز مسطح بجوز عيون بيعمل عليه للعيانين وزوارهم اللى همه عايزينه من شاي وقهوه وحلبه وكراويه ومغات وكركريه وينسون وغيره وغيره ..

وفى المستشفى ديه شفت اللى ماشافوش ماجلان فى رحلته وهو بيلف الدنيا حيران .

فى يوم سمعت دريكه وهيصه والناس بتصرخ وهى بتتكلم وناس بتتكلم وهى بتصرخ وهمه شايلىن- يا حبة محبسى- شاب سايح فى دمه وهو مجهول المعالم والملاح وفهمت من كلام الناس وصراخهم إن الشاب ده كان واقف على سلم الاتوبيس راح سواق الاتوبيس الله يجازيه واخذ ملف شديد قوى لما دخل الميدان الكبير وهو بنفس السرعة اللى كان ماشى بها فى الطريق المستقيم.. راح الشاب بتاعنا ده طائر من سلم الاتوبيس فى الهوا زى ما طار جاجارين من صاروخه فى القضا.. وقبل ما يلمس الشاب الطائر الأرض كان فيه سواق تاكسى لابس نضاره فعر كويابه لسه مستلمها من بتاع النضارات جاى من الناحية الثانية راح شايلى الشاب الطائر وخلاه على نفس حالة طيرانه لكن للناحية الأولنيه فى نفس اللحظة اللى كانت جايه فيه من الناحية الأولنيه عربيه نقل - ٣٦ سلندر- مسرعه ومحملة بالزلط- من نفس نوع الزلط اللى بنوييه السد العالى- وسواقها كان بيمضغ فى بقه حاجه مش بتتاكل وهو مبسوط حبتين وبيصحك من غير سبب راح مخلى الشاب ده- يالووعه غازى وفنيتى- مستمر فى حالة الطيران فى الناحية التالته فى اتجاه شقه دور أرضى شباكها مفتوح على الشارع، وكانت الست أم بليه صاحبة الشقة قاعده على الطبلية الكبيرة وهى بتحشى محشى بدنجان أبيض وأسود والوان أخرى . وفى لحظه لقيت الست أم بليه (اللى عندها عشر عيال دا غير جوزها وأمها وحمانها وأخت جوزها المطلقة وعيالها الستة) الشاب الطائر داخلها من الشباك بسرعة ٣ ماخ / دقيقة واستقر جسمه بعد رحلة طيران فى جميع الجهات الأصلية

والفرعية- على طبليبة الست أم بلييه واستقرت داخل حلة البدنجان المحشى .

المهم عرفت ان الست أم بلييه وجيرانها همه اللي شايلين الشاب اللي يصعب تمييز ملامحه بسبب صدماته الكثيره اللي انتهت بحلة المحشى .

وقعدوا يجروا بيه فى طرقات المستشفى علشان يالفو واحد يسعفه لكن ملاقوش غير الباشتومرجيه فتكات اللي عامله زى الشاويش عطيه بتاع افلام اسماعيل يس .. وسمعت الحوار ده بينهم:

- الحقينا يا ست الدكتوراه الشاب ده حصلته شوية حوادث وخلص بالحقناه يا ملحقناهوش ..

رد الشاويش عطيه بصوت أجش كجرس الرحا:

- أولاً : قبل ما أصرح باسعافه لازم أعرف مين الشاب ده اسمه وسنه ومؤهلاته وصنعتة ومتجوز ولاعازب ولامطلق ولا أرمل ..

ثانياً: لازم أعرف ايه اللي حصله بالظبط .. وازاى وقعتله الحوادث الكثيره اللي بتقولوا عليها دية .

ثالثاً: لازم تعملوا محضر فى قسم الشرطة اللي الحوادث ديه وقعت فى دايرته مع تحديد المسبب فيها وكل الملابس اللي حصلت .

رابعاً : تيجو ومعاكم دكتور علشان يسعفه علشان الدكاتره بتوعنا مشغولين خالص ..

خامساً : تروحوا تشتروا خمسة ولا ستة لتر دم من نفس فصيلة دم الشاب المصاب .

سادساً تيجيبوا معاكم كافة لوازم الاسعافات من قطن لشاش لصبغة يود وكمان حقن تيتانوس وفيتامينات ومطهرات وأريطة وقزاييز جلوكوز ومسكنات ومهدئات ومنبهات الخ .. الخ .. الخ ..



الشاويش عطية في المستشفى

سابعاً: تكتبوا تعهد للمستشفى بان مسئولية حياة الشاب ده أو موته عليكم انتم ولا تقع على المتشفى أدنى مسئولية لما يترتب على اسعافه .

ثامنا: تجيبوا .....

- أيوه .. أيوه .. يا ست الدكتوره بس لما حنعمل كل الحاجات اللي بتقلها حضرتك ديه هيتحول الشاب ده من شاب مصدوم إلى شاب مرحوم ..

- مليش دعوه .. اللوايح بتقول كده .. ولازم ننفذ اللوايح .. احنا هنا عندنا نظام مش فوضى .. الناس اللي بيدخلوا عندنا بيتسعفوا بنظام .. وبيتعالجوا بنظام .. ويموتوا بنظام .. روحوا أعملوا اللي قتلتم عليه وبعدين تعالوا علشان نسعف الشاب ده وننقذ مواطن برىء من الموت .

ومشيت الست الباشتومرجيه فتكات .. قصدى الشاويش عطيه .. وهى منتفخة الاوداج مرفوعة الرأس عالية الأنف والأذن والحنجرة .. وزى ما تكون انتصرت على قبائل الهنود الحمر فى أمريكا وقبائل الزولو فى جبال التبت وقبائل الهمايونى فى جنوب افريقيا ..

ولقيت الست أم بليه وجيرانها ببصوا لبعض ويتهمسوا وبعدين راحو ركنين فتى البدنجان (الطائر سابقا) جنب الحيطه وقالوا يا فكيك وكأنهم فص ملح وداب ..

وقلت فى سرى: يا عالم يا هو .. فين الرحمة؟ فين الشفقة؟ فين الإنسانية؟ أرواح الناس بقت رخيصة للدرجة دية .. شاب عمال بينزف فى دمه وخلص بيطلع فى الروح نسيبه بالشكل ده ونقول لوايح ونظام .. مستشفى ايه ديه اللي لا فيها دكاتره ولا اسعاف ولا دم ولا شاش ولا قطن ولا حاجة أبداً غير اللوايح والنظام .. طيب فاتحنها ليه؟ ما تقفلوها أحسن .. أقول لمين وأعيد لمين الحقونا يا وزارة الصحة؟

## (١٩) امسك حرامى

آه يا حبايبي آه .. آه من اللي شفته واللى كان هيجرالى آه .. كل اللي فات كوم واللى شفته المره دية كوم .. أصل اللي شفته هم ما يتلم .. وعلى رأى المثل : ايه اللي شفنيه يا أم عزيزة .. ضربة وتكشيره وتبويزه .. واللى كنت عندها المره دية ما كنتش أم عزيزه ،، دى كانت أم بهلول .. وآه يا غازى ويا محبسى ويا فُنيتى عليكى وعلى اللي بيجراليك يا أم بهلول .. يلى الدنيا مرمتك يا حبيبتي بالعرض والطول مرمطه تخلى العنتيل لا ينطق ولا يقول ويقع من طوله فى همه يدوب وتبقى أيامه أسود من قرن الخروب ... أم بهلول عندها فى عين العدو سبع عيال .. بهلول وسحلول ومهبول وأم الهم وأم النعم وست الأحزان وغصن البدنجان .. ومشكلة المشاكل وعقدة العقد وكلكوعة الكلاكيع عند أم بهلول تكمن فى جوزها أبو بهلول .. شنطح القزعه .. اللي عايش طول حياته مسطول .. الحشيش والأفيون لحسو عقله من ساعة ما جريه أول مره وهو عريس فى الكوشه لحد ما بقى ما يساويش فردة برطوشه .. وعرفت كل ده من خناقه دبت فى نص الليل بين أم بهلول وأبو بهلول .. شنطح القزعه .. والحكاية بدأت فى يوم من ذات الأيام لما لقيت شنطح فى نص الليل وكل الناس نايمين راح مقرب منى وقافل محبسى وشد الخرطوم منه وراح شايلى وأنا لسه مليانه بالغاز وتقيله .. قلت فى سرى : يا خبيتك يا أبو بهلول واخذنى ورايح على فين .. دا احنا فى انصاص الليالى أما صحيح راجل مرستان واللى بتعمله جنان فى جنان ..

وفى نفس اللحظة اللي شالنى فيها شنطح ظهرت على الشاشة الفضية أم بهلول الجهنمية .. وراحت ماسكه جوزها شيخ الحرامية وسمعت بينهم الخناقة ديه:

- امسك حرامى .. الحقونى يا ناس حرامى فى بيتنا ..

- يا وليه يا مجنونة أنا مش حرامى .. أنا شنطح جوزك ..

- شنطح جوزى .. طيب واخذ انبوية البوتاجاز ورايح على فين يا سى جوزى؟

- ملكيش دعوه بيه وابعدى عنى الساعة ديه يا ولية

- ابعده عنك لأ والنبي .. ولأ نبا النبي نبي .. بقى عايز تاخذ أنبوية البوتاجاز تبعها  
علشان تجيب بتمنها الكيف بتاعك المزفت ده ..

راح شنطح هابدنى على الأرض وكشر علشان يورى لمراته العين الحمرا وقال:

- بقولك أيه .. مالكيش دعوه بيه يا وليه .. أنا صاحب كل حاجه فى البيت ده .. وأبيع  
منه كل اللى أنا عايزه .

- بيت .. هو أنت خلّيت فيها بيت .. بيت إيه يا بو بيت .. ما بعثت كل حاجة فى  
البيت .. دا أحنا بنقعد على الأرض ويناكل على الأرض وبنام على الأرض .. وبعد كل ده  
عايز تاخذ أنبوية البوتاجاز تبعها طيب حنعمل ايه وحنطبخ على ايه ؟

- من ناحية الطبخ ما تشيلش هم .. أنا حبقى اشتريلك كيلو ونص فحم تبقى تطبخى عليه كل  
اللى نفسك فيه .. دا حتى الأكل بيبقى طعم قوى لما يتعمل على الفحم ..

- فحم .. إلهى يدخلوك فى مفحمه ويغطسوك فى مشحمه علشان لا توعى ولا تستوعى  
يا شنطح يا ابن مفستكه العمشه .. بقى يا عرة الرجاله مش مكسوف على نفسك .. مش مكفيك  
تاخذ شقايا من شوية الهدوم اللى بفصلهم للناس .. وتاخذ شقا ولادك اللى شايفين الويل طول  
النهار والليل علشان تتهبب وتتسطل وكمان عايز تبيع الأنبوية اللى حلتنا .. أما صحيح اللى  
اخذشوا ماتوا ..

- يا وليه ما تزعقش قوى كده العيال نايمه .. طيب بقولك ايه يا أم بهلول .. علشان  
اطيب خاطر ك وما تزعلش أنا حجبلك بدل الكيلو ونص فحم اتنين كيلو بحلهم .. يله ..  
إنشا الله ما حد حوش ..

- ياخى اتنين عفاريت يلبسوك ويشندلو حالك يا بعيد .. سيب الأنبوية ديه ..

- أبدأ مش ممكن تاخدى الزفته ديه من أيدي (الزفته ديه تبقى أنا بويه الحبويه إنشا الله  
عشر بلاوى أخوات شققا يشحططوك يا شنطح يا ابن مفستكه العمشه)



أميها أول تقسك لصا

وعنها راحت أم بهلول رقعته بالصوت الحياني:

- يالهوى .. الحقونى يا ناس .. غيطونا يا عالم .. الراجل حيسرق انبوية البيوتاجاز  
ويارى مفيش ثوانى إلا وكان البيت كله واقف على رجل وصحيت العيله كلا من أول بهلول  
وسحلول لحد ست الاحزان وغصن البدنجان واتلمت الجيران وجيران الجيران .. وبدون سابق  
انذار ظهر فجأة عتريس الجزار وعلى هدومه دم كل البقر اللى دبجهم بالنهار وصرخ بصوت  
يهز الحته ويلبش الجته وقال:

- أنت كل يوم حتعملك دوشه على المسا يا ابن مفستكة العمشة ودينى لأنا حطك على  
خطاف فى الدكان واخلى اللى مايشتري يتفرج ..

وعنها وراح عتريس الجزار لافح شنطح الفزعه على كتفه زى ما يكون معزه وقيع  
وهيلحقوها بالسكسن وراح نازل بيه على الدكان .. وشنطح يصرخ ويرفص برجليه ويقول:

- سينيى با عتريس .. سينيى با عتريس

- ودينى ما أنا سايبك لازم اعلقك فى الدكان ..

وأم بهلول فرحانه ويتزغرط وست الأحزان زعلانه ويتعيط .. وبهلول وسحلول ومهدول  
فرحانين ويبسقفوا ويبصفروا زى ما يكون منتخب الكوره جاب جون التعادل فى آخر ثانية  
فى منتخب كفر البلاص ..

وقلت فى سرى : يقطع المخدرات وسنين المخدرات .. واللى بيبيعوا المخدرات واللى  
بيتعاطوا المخدرات .. بقى يا ناس ربنا اداكو عقل وميزكم بيه عن كل مخلوقاته تيجوا انتم  
تسطلوا العقل ده وتلغوه من حياتكم بالمخدرات .. دا العالم كله بيتقدم بالعقل ده .. أقول ايه  
واعيد ايه ..

المهم اللى خلانى كنت حفطس على غازى من الضحك انى سمعت صوت شنطح من  
بعيد وعتريس شايله على كتفه وهو بيقول:

- طيب ما تزعليش يا أم بهلول أنا حخليهم تلاته كيلو فحم بحالهم ...



## (٢٠) حدوتة حماده وبطه

رحت في رحلة من رحلات حياتي الغازية لبيت واسع وشيك.. كل حاجة في البيت بتدل على أن أصحاب البيت ده ناس في العلالى وكل شىء عندهم قيم وغالى.. اشى نجف واشى تحف .. ودى نابولييه مستوردة ودى سجاجيد عجمى منقطه.. وقلت فى محبسى : ايه الهنا اللى انتى فيه ده يا بت يا بويه .. باين عليكى هتعميشى كام يوم حلوين مع ناس متريشين .. ولما استقرت فى المطبخ الجميل الواسع وبدأت اشتغل لقيت سعادة البيه صاحب البيت داخل على مراته وهى واقفه بتحضر الغدا وسمعت منهم الحديث ده...

- أما أنا عندى ليكى حتة خبر يا بطه .. انما ايه .. حقيقى سعيد..

- خبر سعيد.. فرحنى أوام يا حماده فرحنى ..

- البيه الكبير خلاص وافق على طلب الجمعية بتاعتنا 'جمعية الأمانة والنزاهة للإسكان التعاونى' وإدانا تصريح بالأرض اللى طلبناها على الساحل الجنوبى .. ميت فدان ..

- حلاوتك يا حماده يا حبيبى .. وحلاوة البيه الكبير.. ميت فدان حتة واحده .. الله يرحمك يابا لما أجرت قراطين فى البلد من عطوه أبو جموس زغرط فى عبك ..

- تعرفى خدنا الفدان الواحد بكام يا بطتى؟

- بكام يا حوجو؟

- بخمسين جنيه .. يعنى الميت فدان وقفوا على الجمعية .. قصدى علينا.. بخمستلاف

جنيه

- طيب وسعادة البيه خد كام يا روح ؟

- خد يا بطبيطه خمستلاف عن كل فدان يعنى فى الأرض كلها لدع نص أرنب..

- ابن الأرنؤلى .. نص أرنؤب بحاله !!

- وماله .. رينا يبارك له ويخلهمله أرنؤبين وكتكوت .. المهم تعرفى المتر الواحد فى الأرض دى يساوى كام؟

- بكام يا حم حم؟

- بأستك .. أستك يا بطاطس .. أستك .. ألف جنيه ..

- يالهو بالى يا حماده يالهو بالى .. نهارك أبيض بكرانيش مزأططه .. يعنى الفدان الواحد يقف بكام يا غرامى .. قوللى بسرعه لحسن دماغى من الفرحة اتشكلت وعنيه كمان اتلخفت ..

- يقف الفدان الواحد يا طماطم بأربع أرنؤب .. يعنى أربعة مليون جنيه .. أربعة مليون لحوح .. أربعة مليون مطوش .. أربعة مليون أهيف يا حلاوه .. تعرفى .. تعرفى يا بطاطا هنهبر أحنأ بس من الشغلانه دى أد أيه؟

- سايق عليك سيدى الطشطوشى .. وسيدى المرجوشى .. وسيدى البلوشى لو كانت الهدبة زى الجبلوش إنك ما تقوليش .. أنا جتتى مش خالصه ..

- ريعميت أرنؤب يا بلاطه . ريعميت أرنؤب يا قشاطه .. ريعميت أرنؤب يا كفلاطه ..

- منك لله يا حماده يا بن فتحيه .. خليت مخى يتلخخ وجنتى هتسخسح ..

وحنعمل ايه بشولة الفلوس دى كلها .. دا اللى عندنا مش عارفين نوديه فين؟

- شوفى يا كلاما .. هنصرف ميت أرنؤب لزوم الرش والأبهبه والفتجرة والهنكرة ..

- الله يرحم بباك وببايا كانوا بينادلهم ويقولوا : كريات ورا يا أسطى

- متفكرنيش بدادى يا طيطه .. لحسن بيجبىلى استسبحس فى المخيخ وشقباظ فى صباع رجلى الصغير .. والتلتميت ارنؤب اللى حيفضله حنبعتم كالعادة على بره .. وأوعى تقولىلى



لصوص خمس نجوم

لماذا لأن حقوقك عشان قانون من أين لك هذا ؟

- وحياة صلعتك اللي بتنورلى حياتى .. دا كلامك آخر لذاده ..

- دا بقى غير مشاريع اسكان الشباب واسكان الأطفال .. ومشاريع القرى السياحية  
والمساكن الشعبية والاراضى الجبلية فى طريق الاسماعيلية ..

- نهارك فلّيه وليتلك مهلبيه يا حماده يا ابن فتحيه ..

وقعدوا الاتنين .. حماده وبطه .. يرقصوا ويغنون فرحانين بالأرانب والكتاكيت والديوك  
والمعيز والهيز اللي بيهبروه .. وزاد ضغط الغاز جوايا لحد ما كنت حنفجر وأخلص وأخلص  
عليهم . وكان نفسى أصرخ وأقول : يا ناس حرام عليكم اللي بتعملوه ده والبلد اللي بتنهبوها  
دى .. خافوا من ربنا واتقوالله دا سبحانه وتعالى يمهل ولا يهمل .. ولازم بيحى اليوم اللي  
حتدفعوا فيه تمن الهبش اللي بتهبشوه انتم واللى بيسعدوكم على الهبش ده .. وفضلت أقول  
حسبى الله ونعم الوكيل فيك يا حماده يا بن فتحيه أنت ومراتك بطه بنت شيخ العريجه ..



## ( ٢١ ) فشحوطة

وأنا واقفه فى مستودع أنابيب البونجاز لقيت جنبى بالصدفة البت قوعه (المفقوعه)  
والصدا بدأ ياكل من جسمها رقأت رقأت .. وبان عليها الكبر وانعوج محبسها وكانت حالتها  
حال .. رحى قايلاها:

- ازيك يا بت يا قوعه ..

- مين بويه الحبويه .. أهلا بيكى يا حبيبتى ..

- عاش من شافك .. ازيك .. وازى أحوالك ..

- أحوالى .. أحوالى يا بويه لا تسر عدو ولا حبيب ..

- ليه: كفا الله الشر ..

- أنا أيامى يا بويه فى الدنيا بقت معدوده .. أصل الدنيا ما بقتش دنيا .. والناس ما بقوش

ناس ..

- والله عندك حق يا قوعه .. دا أنا اللى باشوفه فى البيوت لا ينحكى ولا ينقرا ..

- مهما شفتى يا بويه .. عمرك ما حتشوفى اللى شفته آخر مره ..

- يا خبر زى بعضه .. شفتى إيه يا قوعه .. احكىلى .. وقوليلى ..

- احكىلك إيه وأوقلك إيه .. دا أنا عايزه أنساه .. أقوم احكىلك ..

- لأ .. وحياة محبسك يا قوعه .. هو انتى تقوليلى الكلمتين دول وبعدين تسكتى .. أنا

لازم أعرف إيه اللى حصلك آخر مره ..

- حاضر يا بويه حاضر .. وحياة فُنيتى المسدوده لأحكىلك .. بقى شوفى يا ستى .. آخر

مره كنت عند الولية اللى ما تتسمى اللى اسمها فشحوطه ..



- فش ايه يا حبيبتي؟ اسمها فش ايه؟
- فش حوطه .. اسمها كده فشحوطه ..
- إلهي يجعلها شوطه ملفوفه جوه فوطه فشحوطه بنت أم فشحوطه ..
- اسمها ده ما وردش في سجل الاسماء العربية ولا الأجنبية ولا حتى في سجل اسماء العفاريث الزرق ..
- مش مهم .. المهم هي عملت ايه الوليه ديه .. ؟
- الوليه القرشانه ديه كانت ساكنه في بيت بعيد جنب ملقف زبالة البلد ..
- آه يعنى فشحوطه بتشتغل في الزبالة .. بتلقى منها اللي ينفع ويتباع ويتستفيد منه مش كده يا قوعه .. كانت بتاجر في الزبالة ..؟
- ياريت يا بويه يا حبيبتي يا ريت .. فشحوطه مكانتش بتاجر في الزبالة .. دي كانت بتاجر في البنى آدمين .. كانت بتشغل العيال الصغيره وعمله عليهم ريسه ..
- دي فشحوطه دي ست واعيه .. وكتر خيرها .. عارفه إن في البلد نوعين من البطاله: بطاله علني للخريجين اللي قاعدين من غير شغل عشره خمستاشر سنه وبطاله مقنعه من الموظفين اللي بالكوم وملهمش شغل يشتغلوه .. وبالتالي فشحوطه بتساعد إلى حد ما في القضاء على البطاله ديه وتشتغل العيال من صغرهم ..
- والنبي انتى على نياتك يا بت يا بويه .. فشحوطه ديه عامله مدرسه .. مد .. مد .. مد ..
- مدرسه .. دا شيء كويس جدا .. وأظن مسمياها «مدارس فشحوطه النموذجية للغات، يا سلام دي ست عظيمه فشحوطه هانم لانها عارفه مدارسنا دلوقت لا بتعلم ولا بتربي فقررت ان تساهم في تربية اولاد البلد ..



مدرسة فشجوة النموذجية العالمية

- يا سلام عليكى يا بوبه لما تقطعيني فى الكلام.. مش تستنى لما اكمل كلامى..

- آسفه يا قوعه.. خلاص مش حنطق .. اتفضلى كملى كلامك..

- فشحوطه دى عامله مدرسة لجميع الأعمار من الجنسين بنين وبنات .. ثلاث أقسام القسم الأول «عيال للبيع» والقسم الثانى «عيال للنشل» والقسم الثالث «عيال للشحاته».. وهى بتلم العيال دول من الشوارع ومن الملاجىء ومن اللى بتسرقهم من مستشفيات الولادة..

- ايه اللى بتقوليه ده يا بت يا قوعه.. يا حومتى على غازى ومحبسى وفنيتى..

- بالنسبة للقسم الأول ده بتاع البيبهات الصغنطه.. بتعرضهم للبيع للناس اللى ما بيخفوش.. ويتبيع الكيلو من العيال دول مشفى من غير عضم بـ ٢٠٠ جنيه بخلاف ضريبة المبيعات والدمغات ومصارييف بدل الوأوه وبالنسبة للقسم الثانى «عيال النشل» بتقوم فشحوطه بتعلمهم قواعد وأسس وأصول النشل وقوانينه وعندها مجموعة متميزة من خبراء أجنب من حرمية شيكاغو ونشالين روما وشمحطجية ايرلنده اللى بيدوهم كورسات نظرية وتدريبات ميدانية عملية وبعدها كل واحد من العيال دول ياخذ شهادة NKO

- ويعنى إيه يا بت يا قوعه شهادة الـ NKO

- يعنى «نشال كبير قوى» أما القسم الثالث يا حبة محبسى وهو قسم «عيال الشحاته» فده اللى خلانى اكره حياتى الغازية.. تتصورى يا بوبه عيال صغيره ولاد وبنات تيجى الوليه فشحوطه اللى عمرها ما حتورد على جنة أبداً تعمل فيهم عاهات مستديمه .. فتسخن تحت حديد على البوتاجاز اللى أنا مشغلاه وتكوى بيهم العيال دول فى وشهم وعلى ايديهم وعلى جنتهم والعيال تصرخ من ألم الحرق ولأ كله كوم وعمليات قطع إيد ولأ رجل لعيل من العيال كوم..

- يا ساتر يا رب.. كفايه يا بت يا قوعه كفايه..

- لما انتى بتقولى كده من السمع بس.. امال أنا أعمل إيه اللى شفت كل ده .. والاكادة

إن الوليه دى عندها فلوس لا تعد ولا تحصى وهيه زى ما هيه سحنتها مهيبه ورحتها معفنه .

وقعدت قوعه تحكى وتحكى لكن أنا سرحت وقلت فى نفسى فىن الشرطة والبوليس اللى ببيقوا واقفين بالآلاف فى الشوارع لما حد كبير بيكون معدى .. فىن همه دول علشان يمسكوا فشحوطه وأمثالها اللى همه أساس جرايم البلد.. فىن الشرطة وفىن البوليس علشان يحموا العيال الصغيرة من اخطبوط فشحوطه وخبرائها الأجانب من حرمية شيكاغو ونشالين ايطاليا وشمحطجية ايرلنده .. فىن الشرطة وفىن البوليس علشان يطهروا البلد من النشل ومن الشحاتة خصوصا من السياح الأجانب اللى ما يصدقوا يشوفو عيب فى بلدنا ويروحو يصوروه علشان العالم يشوف وجه بلادنا القبيح وينسى وجه بلادنا المشرق .

وفجأة راح لافحنى عامل المستودع على كتفه علشان يودينى فى رحله من رحلاتى الغازية وسبت البت قوعه واقفه بتكلم نفسها عن فشحوطه ومدارس فشحوطه .

## (٢٢) نظرية ابن الأرنؤلى

فى مطبخ شىك قوى داخل عيادة دكتور شىك قوى قوى كانت رحلتى المره ديه .. وقلت فى محبسى: يا سلام يا بت يا بويه حتتمتعى كام يوم وانتى فى وسط النضافه ديه وحولىكى ملايكة الرحمة فى ملابسهم البيضة اللى زى الفل واشكالهم الجميلة اللى زى القمر .. ولمحت اسم صاحب العيادة وأنا داخله من الباب : «الأستاذ الدكتورى .. ص الأرنؤلى .. زميل كل جمعيات العالم الطبيه .. وصاحب أحدث نظرية فى علاج أمراض القلب والأوعية الدموية» ..

وقلت يا سلام على ده دكتور ويا سلام على ديه عياده بتخفف آلام العيانيين .. صحيح الرحمة بين الناس حلوة وجميلة .. لكن نقبى طلع على شونه .. وانطبق على العياده ديه المثل اللى بيقول : « من بره هله هله .. ومن جوه يعلم الله » .. لأن من أول يوم جيت فيه سمعت أن الدكتور صاحب العيادة أصدر فرمان باجتماع عام لكل الممرضات والعاملين بالعياده داخل الرسبشن .. ولما جه ميعاد الاجتماع سمعت الدكتورى .. ص . الأرنؤلى بيقول :

- أنا مجتمع بيكم النهارده علشان نخط النقاط فرق الحروف .. ونحدد المبادئ اللى حتمشى عليها العيادة .. المبدأ الأول : مبدأ النظافة .. وأعنى بالمبدأ ده أن كل مريض يدخلنا لازم ننصف جيبه من الفلوس تماماً لآخر قرش تعريفه ..

وسمعت ممرضه فافى خالص ولادغه فى حرف الره بتقول بكل دلع :

- طب ازاي يا دكتوروى ننصف جيوب المبيض من كل قيش تعييفه .. يعنى نشيبه حاجه أصفيه عشان ينام ونيوح بسيعه سبيقته ..؟

- أنا حاسس من ساعة ما جيتى تشتغلى معانا يا فريال يا بنت محرم قصى .. يا فييال يا بنت محيم .. إنك هتدويننا كلنا فى داهيه وحندخل على ايديكى السجن .. أنا أقصد يا اسانس غباء العالم إ إحنا ننصف جيوبه بالعقل والذكاء والنصاحه مش بالحاجه الأصفره ونرقده ونسرقه ..

ردت فريال محرم بنفس درجة الدلع وعلى نفس المستوى من الغباء :

- طيب طيب حضيتك يا دكتورى تيسينا على المفروض نعمله واحنا بسيعه نعمله ..

- حاضر يا فريال يا بنت محرم حرسىكى على المفروض تعملوه يا أسانس غباء العالم  
يعنى مثلاً أول ما يدخل المريض للعيادة نخليه يكع ١٥٠ جنيه رسوم كشف .. وأنا أول ما  
حيدخل حجرة الكشف أروح مستخدم معاه شوية أجهزة أى كلام واديله حقتين وشوية  
أقراص ويلابيع وأهف منه ٢٥٠ جنيه

قالت فريال:

- كده نبقى خدنا منه ايبعميت جنيه .. أظن يا دكتورى دى هيبه كبيبه ..

قال الدكتور:

- لألسه يا فريال .. احنا حناخد منه بعد ما يطلع من حجرة الكشف ٢٠٠ جنيه رسوم  
مهن طبية وضريبة مبيعات ودمغه وبدل تأثيث عيادة ورسم خاص نظير موافقتنا إن إحنا  
نعالجه ..

قالت فريال وهى بتضحك ببلايه :

- بياقو يا دكتورى .. بياقو .. أفكايك يائعه ..

قال الدكتورى .. ص . الأرندي:

- المبدأالثانى : مبدأ الايمان .. وأعنى بالمبدأ ده .. الإيمان بأن كل الناس حتموت  
وخصوصاً العيانيين بالقلب اللى بيوردوا علينا ..

وسمعت صوت الممرضة قنكات بعدما شكلت وشها بشوية حركات وصوتها اللى عامل  
زى صوت شكمان خريان متركب على موتور عدمان:

- الموت علينا حق يا دكتور.. دا حتى كل اللي ماتوا عندنا يموتوا وهمه مبسوطين  
ويبقوا عابزين يرجعوا الدنيا تاني علشان يموتوا على ايدينا مرة تانية ..

رد الدكتور الكبير وقال :

عظيم .. وبكده احنا بنضرب عصفورين بحجر.. أولاً: بنريح المريض من الدنيا  
وبلويها ..

ثانياً : بنساعد الدولة في حل مشكلة زيادة السكان

اما المبدأ الثالث هو مبدأ العمل.. وأعنى بالمبدأ ده .. العمل بكل اللي نقدر عليه إن أحنا  
نوهم المريض إن حالته خطيره خالص .. وإن علاجه مش موجود في أى حتة في الدنيا  
غير عندنا في العيادة ..

وقالت الممرضة زيزى اللي بتستعرض بلبسها ويتمشى تتقصع زى ما تكون ما نيكان  
في مهرجان كان ..

- اطمئن يا دكتور.. ده كتير من اللي بيوردوا علينا ما بيكنوش عيانيين ولا حاجة نروح  
احنا مفهمينهم إنهم عيانيين خالص زى عبد الحليم حافظ في فيلم حكاية حب يروحوا بقدره  
قادر عيانيين فعلا من الوهم اللي بيحصل ليهم من كلامنا ..

ضحك الدكتورى ص الأرنديلى وقال : عال.. عال.. وبكده نكون حققنا مبادئ  
نظريتي الثلاثة : النظافة .. الايمان .. العمل.

قالت فريال محرم اللي عندها لدغه في حرف الره :

- بيافور.. بيافور.. والنظييه ديه عييفتها ازاي يا دكتورى؟

رد عليها وقال:

- دى نظرية اتعلمتها من البرفسور العالمى الكبير ليمانجو سفاحوس خريج حوارى





عصابة ابن الاردلي

شيكاغو.. قصدى جامعات شيكاغو

وسمعت الكل بيهتف ويقول:

- يعيش ليமானجو سفاحوس.. ويعيش دكتورنا اليرافسيوس

وجانى ضغط على فى غازى وكنت حطق من اللى سمعته.. يا عالم فيه ناس بالشكل ده.. المفروض فى عيادات الأطباء الناس تلاقى الرحمة والأمانة والاخلاص والضمير الحى والعلم والطمأنينة والعلاج الصحيح بحيث يدخل العيانيين ليهم تعبانين ويخرجوا من عندهم سالمين معافين مش يدخلوا سالمين يطلعوا منها ميتين..

ولعنت اليوم اللى دخلت فيه العيادة ديه.. ولعنت اللى بيتجروا بحياة الناس وأرواحهم.. اللى بيموتوا الناس ويخدوا فلسهم باسم الطب.. وفوق كده وكده لعنت مبادئ ونظرية ابن الأرانديلي.



## (٢٣) هموم الأستاذ حلمى

فى مشوار من مشاويرى الغازية لقيت فى بيت من البيوت اللى ممكن تتوصف بأنها مستورة .. وعرفت من ملاحظاتى إن أنا فى بيت علم لأن فيه مكتب ومكتبة فيها كتب كتير .. وقلت فى محبسى : يا سلام يا بت يا بويه المره ديه حتعيشى كام يوم مع العلم وأهل العلم اللى دايمًا بيمتازوا بالأخلاق الحميدة والتربية العالية الرشيدة .. وفعلًا إتأكدت إنى فى بيت مدرس ومتجوز مدرسة .. المدرس اسمه الأستاذ حلمى ومراته اسمها أبله سعاد .. وفرحت كتير إن همه الإثنين من نفس التخصص الحساب والهندسة وقلت فى نفسى: يا سلام على الشغلانة ديه اللى قال فيها الشاعر الكبير : قَم للمعلم وفيه التبجيلا .. كاد المعلم ان يكون رسولاً ..

وكمان قلت فى نفسى: يا سلام على تخصص الأستاذ حلمى وأبله سعاد اللى بيعلم الاولاد إزاي يحسبوا وإزاي يفكروا تفكير سليم ..

وفى يوم من ذات الأيام بعد ما رجعت أبله سعاد من المدرسة وقفت معايا فى المطبخ علشان تحضر الغدا ليها ولجوزها .. ولما وصل الأستاذ حلمى من مدرسته جه طوالى على المطبخ وقعد يتكلم مع مراته لكن يظهر أنه كان مضايق قوى وسمعت منهم الحديث ده :

- حمد لله على السلامه يا حلمى ..

- الله يسلمك يا سوسو ..

- ايه .. شيفاك مضايق حبتين .. حصل حاجه فى المدرسة ..

- المدرسة .. دا أنا لا عايز أروح المدرسة ولا عايز أشوف تلامذه وعايز استقيل من الشغلانه ديه اللى تقصر العمر ..

- إيه بس اللى حصل النهارده ؟

- هو النهارده بس .. دا النهارده وبكره وامبارح .. دى بقت عيشه لا تطاق ..

- بس أهدى كده يا حلمى يا حبيبي واحكيلى إيه اللي حصل؟

- مش يا سوسو يا حبيبتى شغلنا فى الحساب والهندسه أصلاً علشان نساعد التلاميذه

على إزاي يحلو المسائل والتمارين ويتعودوا على الفهم والتفكير السليم؟

- أيوه يا حبيبي ..

- وأنهم بيتعدوا عن الحفظ اللي من غير فهم ..

- مضبوط يا روحى هو ده عايز كلام ..

- أهو ده اللي أنا بعملوا فى الحصص مع تلاميذى تعرفى كان جزائى النهارده إيه؟

- جزائك إيه .. طبعا شهادة تقدير كبيرة ..

- شهادة تقدير كبيرة!! الله يخليكى .. أنا جانى لفت نظر ..

- لفت نظر!! ليه ..؟ وازاي؟

- أنا لما عملت امتحان للتلاميذ جبيلهم فيه مسائل وتمارين من كتاب المدرسة ونماذج

أسئلة الوزارة .. بس كل اللي عملته إنى غيرت فى الأرقام وخطيت فكره بسيطة علشان

التلامذه تفكر .. لكن التلامذه معروفش يجاوبوا فى الامتحان علشان حافظين مسائل وتمارين

الكتاب ونماذج الوزارة صم .. وأى حاجة فيها تفكير ما يقدروش يحلوها ..

- وطبعا كالعادة قدموا شكوى لمدير المدرسة ..

- عليكى نور .. والمدير راح مبلغ إدارة التعليم اللي دايمًا بتكون مع التلامذة ضد

المدرس .

- راحت إدارة التعليم بعثالك لفت نظر ..



هموم تربية

- بالضبط .. بعنولى لفت نظر علشان بعوق العملية التعليمية ويقف ضد التطوير ..  
ويعرقل مسيرة التقدم .. بعنولى لفت نظر علشان بعود التلاميذ على التفكير مش على الحفظ  
والترديد !!!

- يا سلام عليهم .. مش وزارة التعليم دايمًا بتقول فى تصريحاتها اليومية إنهم عايزين  
جيل مفكر مش جيل حفيظ ..

- دا الكلام المعطن بتاع الاستهلاك المحلى .. لكن الواقع مختلف تمامًا .

- دا أنا كمان بعانى من مشكلة كبيرة يا حلمى وهيه أن مافيش فى ايدى سلطات تخلى  
التلامذة يعملولى حساب .. أعمال السنة إالى كانت بتخلى المدرس يقدر التلميذ تقدير صحيح  
سواء فى الدراسة ولأ فى سلوكياته لغوها ..

- وكمان يا سوسو المدرس ما يقدرش يستخدم أى أسلوب من أساليب العقاب علشان  
التلامذة تعملوا حساب وإلا يتحول للتحقيق ..

يعنى زمان كان المدرس بيخوف التلامذة بأوضة الفيضان دلوقت التلامذة همهمه اللى  
بيخوفوا المدرس بشكاوى للوزارة توديه فى خبر كان ..

- وبالتالي ما فيش فى إيد المدرس سلطات عمله هيبه واحترام قدام تلامذته

- هيبه واحترام .. دا كان زمان لما كان فيه تعليم صحيح وتربية حقيقى ..

- والله أنا مستغربة .. إزاي الوزارة عايزه تحقق أهدافها التربوية من خلال المدرسين  
وهى فى نفس الوقت بتحاربهم وبتهددهم بالويل والثبور وعزائم الأمور ..

- وده كله كوم ولما نيحى ندى درس لتلميذ ضعيف بقعدوا يشنعوا علينا ويقولوا  
«مافيا الدروس الخصوصية، طيب ماهو التلميذ الضعيف هو اللى بييجى لحد عندنا .. وكمان  
دا شىء ما نقدرش نستغنى عنه فى ظل المرتبات الهزيلة والأسعار المولعة نار ..

- إسمعني المدرسين .. طيب ما هو الأطباء والدكاتره كل واحد فاتحله عيادة خصوصي وبيأخذ في الكشف الشيء الفلاني وكثير منهم بيعالجوا غلط وناس كثير يموتوا على أيديهم مش بيقولوا ليه «ما فيه الدكاترة»

- وألا المهندسين .. كل واحد فيهم فاتح مكتب هندسة ومقاولات والعمارات بسم الله ما شاء الله كل يوم بتقع .. مش بيقولوا ليه «ما فيه مهندسين» ..

وقعدت أبله سعاد مع جوزها الأستاذ حلمي يشكو همومهم لبعض وأنا في غاية التأثر .. إزاي أوضاع أهل العلم وصلت بالشكل ده !! هو فيه تعليم حينصلح إلا بمدرس محترم ليه مكاتته عند الوزارة وعند تلامذته وعند الناس كلها ..

وعرفت ليه في حياتنا سلبيات كتيره .. والسبب سلبيات التربية والتعليم اللي أساسها مدرس بيأخذ كل حقوقه علشان يدي كل واحد واجباته .. وسبت البيت ورحت لمشوار تاني لكن لحد دلوقت متاعب الأستاذ حلمي وأبله سعاد مضيقتاني .

## (٢٤) ابداعات شلاضيمو

فى مشوار من مشاويرى الغازية رحبت بيت فى منطقة شعبية وفى شقة صغيرة على سطوح بيت مبنى فى عهد السلطان «قلاووظ» اللى كان مجوز الاميره « بريمه » دخلت على مطبخ ضيق حطانه مهيبه .. ورحته معفنه .. وأرضيته مطينه .. كله كراكيب عجيبه .. وحلل غريبه .. وأطباق وكوبيات أشكال وألوان .. منها اللى مكسور ومنها اللى مصدى ومنها اللى محروق .. وكله كوم وكمية الحشرات الموجودة وأنواعها حاجه كده تشرح قلب باحث فى كلية الزراعة بيألف موسوعة عن عالم الحشرات ..

وقلت فى محبسى : وقعتك سوده يا بت يا بويه المره ديه .. وعرفت ان صاحب الشقة ديه .. قصى الزريبه ديه واحد اسمه « شلاضيمو » وإنه قاعد لوحده .. ولما بييجى الليل تتملى الشقه ديه بناس كتير ستات ورجاله من اللى بيسموا نفسهم فنانين .. ده بيغنى .. وده بيلحن .. وده مزىكاتى ..

وقلت : معلىش الواحدة تستحمل القرف اللى فى المطبخ فى سبيل أسمع أغانى حلوه وأحان جميله .. لكن نقبى طلع على شونه لانى عرفت من المناقشات اللى سمعتها إن شلاضيمو صاحب الشقة كان صبى قهوجى وإنه لما كان بيحبيب الطلبات للزباين كان بينغمها بطريقة تعجب الزباين وتضحكهم عليه زى : وعندك واحد شيشه وشاى ثقيل مخصوص لبرطوشه ابن العنتيل .. وعندك واحد حلبه وواحد كركريه لحشكه وتيفه ولاد الايه .. وهكذا ..

ولما شلاضيمو أتأكد من الموهبة ديه راح مقدم استقالته للمعلم « سيد حنجوره » صاحب قهوة « على مزاج مزاجك » واشتغل مؤلف أغانى هابطه ونازله وواقعه ..

وفى ليله من الليالى سمعت الحوار ده من شلة الأنس اللى اتجمعت عند شلاضيمو ..

- اسمع بقى يا سى شلاضيمو .. أنا عايز كلام عاطفى أغنيه .. كلام يرعب الحته

## ويلبش الجته

- من عينه يا معلم عجه .. اسمع يا سيدى ، صوت شدة نفس طويله من شيشه غير عاديه ،

حبيبي ذللتنى ذل الأبل .. من حبه يا ناس قرئت اتهيل

اجرى وراه أفع انكفى .. وهو يشفنى على طول يختفى ..

وصرخ عجه وهو بيكح كحه واحد عنده سل مزنيبقى:

- الله .. الله يا سى شلاضيمو .. فنان صحيح .. مش فنان كروديا ..

- وأنا كمان يا سى شلاضيمو عايز كلام ما يقلش عن كلام المعلم عجه ..

- يا سلام من عنيه التنتين يا اسطى بهلول خد عندك:

أنا وحبيبي بلاص عسل .. هو العسل وأنا البلاص

حبيته يا ناس أهو ده اللى حصل .. وحبه آه جاننى يا ناس

- يا خرابى على الكلام العسل ده يا سى شلاضيمو .. دى غنوه بقى بتعبر عنى مطبوط

أنا فعلا كتير من الأوقات بحس بأن أنا بلاص ..

وفجأه سمعت الكل بيصرخ ويقولوا .. هيه .. هيه .. الست سنيه بعجر رقاصة الاذاعة

وصلت .. هيه .. سلام كبير قوى ..

وسمعت صوت زى صوت وابور ظلط دهسه قطر بضاعة سواقه فى سابع نومه

- أهلاً بيكو يا أسطوات .. شوبش يا حبايب ..

- أهلاً بيكى انتى يا ست سنيه يا أشهر أرتست فى حارة ، حبينى ،

- عملتلى ياواد يا شلاضيمو الكلام بتاع الـ «الشوه اللى حطلع بيه فرح البت  
«عصوصه» بنت المعلم فخده الجزار الخميس اللى جاى ..

- نعم يا ست الكل اسمعى الحته ديه:

قرداتى .. حبيبي قرداتى .. لكن بحبه يا أخواتى

يدور بالطبله يغنى .. الهبله حتبقى مراتى

- تسلم شلاضيم اللى جابوا شلاضيمك .. والغنوه الثانيه:

- جاهزه يا ست الكل .. اسمعى :

الجردل مره شافنى .. راح واقع واندلق

طوالى جابلى أهله .. مع دبله وكام حلق

وسمعت صوت وابور الظلط المدهوس بيضحك ويقول:

- حلوه قوى الجردل ده .. يا مقطف ..

وضحك الكل وزأططوا وانبسطوا من فن شلاضيمو وابداعاته اللى هتسعد الناس فى حارة  
« خبينى » وحارة « حلق حوش » وحارة « حاسب كبسه »

وقلت فى محبسى : الله يرحم زمان وفن زمان ومغنى زمان .. الله يرحم الست أم  
كلثوم والأستاذ عبد الوهاب والأستاذ عبد الحليم حافظ والأستاذ فريد على اللى قدموه من فن  
راقى وأغانى محترمه أسعدت كل الناس ..

والله يقطعكم يا بعده .. يقطع شلاضيمو وعجه وبهلول .. ويقطع سنیه بعجر رقاصة  
الاذاعة اللى حتغنى فى فرح عصوصه بنت فخده الجزار للقرداتى وللجردل ،، وبقيت ادعى  
ليل نهار ان رينا يخلص الغاز اللى جوايا بسرعه علشان اتعتق من شلاضيمو .. وشلة  
شلاضيمو وابداعات شلاضيمو ..



الأغاني الشيلية الهيباوية

## (٢٥) حصص ودنيا « أم كفتة »

مشوارى المرة ديه عجيبه من عجائب الدنيا التمنية .. لأنهم سبع عجائب واللى أنا شفته هو العجيبه رقم تمنية ، علشان اللى حصل ما وردتشى في كتابات الجبرتى وتاريخه ولا فى حواديت جحا وتلبينه .. واحكى الحكاية من أولها .. المتعارف عليه فى دنيتنا «دنيا أنابيب البوتاجاز» إن الزيون ياخذ الواحدة مننا من المستودع فى عربية فى تاكسى .. أو على موتوسكل .. أو حتى على بسكلته .. لكن أنا الوحيدة فى العالم ده كله إالى ركبونى على حمار .. اسم الله على مقامكم .. أى والله على حمار .. حمار إنما إيه .. حمار حصارى .. وعرفت إن اسمه «حصص» .. وعرفت كمان إن اللى راكب حصص وخدنى من المستودع هو «الواد كفته» .. وحطنى كفته قدامه على حصص وقاله : فكيك عالبيت يا حصص .. وعلى طول سمع الحمار الكلام وجرى ييرطع فى الشارع بسرعة ربع ماخ/السنة بقوة جحش ونص ، والواد كفتة حاضنى بايديه الاتنين ومتخيل نفسه شجيع السيمى راكب فرس طابير بيه وواحد قدامه على الفرس حبيبه «اللى هو أنا بوية الحبوية» جاتوا القرف فى ريحة هدومه زى ما يكون ما استحماش من تاريخ قبل الميلاد .. واستغربت إن حصص فى منتهى الوعى وهو ييجرى فى الشارع .. فلما يكون فيه زحام من عربيات وناس وغيره يبطأ ويمشى على مهله .. ولما يخف الزحام يسرع ولما يحب يحود يمين ولا شمال يهدى سرعته تماماً لحد ما يطمئن إن الطريق يسمح بحركته .. ولما حصص شاف إنه قرب من إشارة مرور حمرا راح مهدى سرعته لحد ما وصل إليها ووقف على طول لكن البهوات والبشوات اللى راكبين الزلمكة والشبح والبودرة وعيون صفية وودان علوية وصوابع فكرية محدش فيهم وقف واحترم إشارة المرور الحمراء زى ما عمل حصص .. لكن فضلوا على نفس سرعتهم الجنونية زى ما يكونوا فى سباقات عالمية من أسوان لحد السبتية .. وقلت فى محبسي تسلم يا حصص يلى فاهم قيمة اشارات المرور وفايدتها وفاهم عواقب عدم الالتزام بقواعد المرور وخطورتها .. المهم واحنا واقفين فى إشارة المرور وقفت جنبنا عربية نص نقل شايلة عفش عروسة وفيه كام بنت على العربية عملين يسقفوا ويزغرطوا ولمحت

وسط العفش بوتاجاز بتلات عيون وفرن وجنبه صحبتي قوعة (المفقوعة) بس ما كانتش  
واخذه بالها منى .. فصرخت عليها : قوعة .. قوعة .. بت يا قوعة .. فردت عليه بفرحه :  
مين !! بوبة الحبوبة .. ازيك يا بت يا بوبة ..

وعلى طول ضحكت قوعة وسخست على غازها من الضحك وقالت لى :

- ايه اللي انتى ركباه ده يا بت يا بوبة ..؟

- دا حصحص .. حمار حصارى .. فاهم وواعى ويحترم نفسه واللى حواليه ..

- ومين اللي واخذك قدامه ده ..

- دا الواد كفتة ابن ام كفتة .. جاتوا القرف في ريحة هدمومه زى ما يكون ما استحماش  
من أيام تحتمس السادس عشر .. واحنا رايعين على بيت أم كفتة بتاعة الطعمية .. وانتى  
على فين يا قوعة .. ؟ ردت في تفاخر وشماتة :

- أنا رايحة بيت عريس وعروسة هيتجوزوا النهاردة ..

- هنيالك يا قوعة .. الدور والباقي عليه ..

وفي لحظة اتغيرت اشارة المرور وبقت خضرا .. وانطلق حصحص بسرعه الأولنية  
وأنطلقت العربية النص نقل بقوعة وعفش العريس والعروسة .. ودخل حصحص بينا على  
حثة غريبة .. عالم غريب .. عالم كله عشش .. اللي مبنية من الصفيح المصدى وديه من  
الطين والخشب وديه من الخشب .. وعرفت إن أنا في عزبة القرود ولقيت حصحص عارف  
سكته بيجرى ويبحود يمين ويبحود شمال بنفس السرعة وزى ما يكون فى دماغه دسك  
كمبيوتر بيوجهه . لحد ما وصلنا إلى عشة وأم كفتة، الولية بتاعة الطعمية .. ريكم والحق أنا  
شفت منظر العشة والمجارى حوله من جميع الجهات الأصلية والفرعية جاتني صدمة  
غازية وحالة هستيرية وتقلصات فنيوية والتوانات خرطومية .. أنا بوبة الحبوبة يدور بيه  
الزمن واترمى الرمية ديه

قصر الكلام خادتنى الوليه أم كفته الجهنمية وبدأت تشغلنى فى عمائل الطعمية ولمت حوليها كل ولادها وبناتها .. الولاد علاوة على كفته «جاتو القرف فى ريحة هدومه» كبدة وعضمه وكرشه .. والبنات : ليه وكوارع وشغته .. والكل منهمك فى عمائل الطعمية .. ده بيدق .. وده بيقطع .. ودى بتفصص .. ودى بتقلى .. وريحة الزيت اللى طالعه من قلى الطعمية تنافس فى اعتزاز وكبرياء ريحة هدوم الواد كفته .. وتقريباً همه بيغيروا زيت القلية ده كل عشرين الف قلية ويسمح بالتجاوز فى حدود خمستلاف قلية .. ويا سلام لما يتلموا حولينا القرادتية بقرودهم وأولادهم (ماتفرقش كتير) وياخدوا ساندوتشات الطعمية ويقعدوا يكلوا ويزأططوا ويتنططوا والقروود بتبصلهم بقرف واحساس بيقول انهم عابزين يرملهم فول سودانى همه وأولادهم .. وبصيت حوليه وأنا مهمومه ومغمومه لقيت عفش ومجارى ويط بيعمل مسابقات سرعة فى مياة المجارى «زى مسابقات التلى ماتش» وقروود وحمير وعربيات كارو وعربيات جاز وعربيات روبايبكيا .. وكله كوم وجحافل الدبان والناموس كوم .. حاجة كدة تتحدى جحافل المغول والتتار وقبائل ما وراء الانهار .. وقلت فى محبسى : ايه القرف ده .. وازاى الناس دى عايشه كده فى حياة كلها تلوث x تلوث من أول يبايع المجارى وجحافل الحشرات لحد ريحة هدوم الواد كفته ابن ام كفته «جاته القرف» .



أنا وحصص وكفته المورف

## المحتويات

الصفحة

١	المقدمة
٣	الحلقة الأولى : بداية حياتي الغازية
٦	الحلقة الثانية : اهمال X اهمال
٨	الحلقة الثالثة : الصمت الرهيب
١٠	الحلقة الرابعة : الزمبليطة X الصالون
١٢	الحلقة الخامسة : حب وتربية
١٥	الحلقة السادسة : الشخشيخة
١٨	الحلقة السابعة : جشع وضلال
٢١	الحلقة الثامنة : سيدي الباشا
٢٥	الحلقة التاسعة : اللت والعجن X رمضان
٢٨	الحلقة العاشرة : اخوان الشياطين
٣١	الحلقة الحادية عشر : لا حياة لمن تنادي
٣٤	الحلقة الثانية عشر : اخص على الفاطرين اخص
٣٧	الحلقة الثالثة عشر : اصحاب العقول X نعيم
٤١	الحلقة الرابعة عشر : سياسة قوعة
٤٤	الحلقة الخامسة عشر : معركة الدرجة الكبرى
٤٨	الحلقة السادسة عشر : لمو آخذة يا حاج
٥٢	الحلقة السابعة عشر : احزان رومه
٥٧	الحلقة الثامنة عشر : الحقونا يا وزارة الصحة
٦١	الحلقة التاسعة عشر : امسك حرامى
٦٥	الحلقة العشرون : حدوتة حمادة وبطه
٦٩	الحلقة الحادية والعشرون : فشحوطة
٧٤	الحلقة الثانية والعشرون : نظرية ابن الازندلى
٧٩	الحلقة الثالثة والعشرون : هموم الاستاذ حلمى
٨٤	الحلقة الرابعة والعشرون : ابداعات شلاضيمو
٨٨	الحلقة الخامسة والعشرون : حصص ودنيا «ام كفتة»





رقم الايداع

٩٧/١٠٢٥٢

مطبعة برنت هوم